

IZVOD IZ TRANSKRIPTA SA 54. SJEDNICE SKUPŠTINE KANTONA ODRŽANE 13.03.2014. U KOJEM JE SADRŽANA RASPRAVA PO 1. TAČCI DNEVNOG REDA (NACRT ODLUKE O OSNIVANJU JAVNE USTANOVE CENTAR ZA DJECU I ODRASLE OSOBE S POSEBNIM POTREBAMA ZDK (SA ELABORATOM O DRUŠTVENO-EKONOMSKOJ OPRAVDANOSTI OSNIVANJA I NAČINU FUNKCIONISANJA POSTOJEĆIH DNEVNIH CENTARA ZA DJECU I ODRASLE OSOBE S POSEBNIM POTREBAMA U ZDK, KAO EDUKACIJSKO-REHABILITACIJSKE USTANOVE))

NAPOMENA: Skupština Zeničko-dobojskog kantona je na 54. sjednici održanoj 13.03.2014. godine, shodno odredbi člana 152. stav 1. Poslovnika Skupštine Zeničko-dobojskog kantona, odlučila da se Odluka o osnivanju Javne ustanove Centar za djecu i odrasle osobe s posebnim potrebama Zeničko-dobojskog kantona razmatra u formi Nacrta i da se o istoj vrši rasprava na 54. sjednici Skupštine, dana 13.03.2014. godine, te se sa Prijedlogom navedene Odluke postupilo kao sa Nacrtom i o istom se odmah vršila rasprava na samoj sjednici Skupštine, koja je okončana donošenjem odgovarajućeg Zaključka o prihvatanju Nacrta Odluke o osnivanju Javne ustanove Centar za djecu i odrasle osobe s posebnim potrebama Zeničko-dobojskog kantona i upućivanju iste u javnu raspravu u trajanju od 30 dana, koji je takođe objavljen na web stranici Zeničko-dobojskog kantona

SENAD KARAVDIĆ - KOMISIJA ZA RAD, SOCIJALNU POLITIKU, IZBJEGLICE I ZDRAVSTVO

Jest, to je to. Pa evo, Komisija je, znači, podržala navedenu Odluku te predlaže Skupštini da istu donese, ali sugeriše predlagачu da na sjednici Skupštine detaljnije upozna poslanike o načinu finansiranja i djelokrugu rada ove ustanove. Evo ministar je već nešto rekao. Ovdje mi smo naveli u Komisiji, znači, u izvještaju Komisije se traži detaljniji izvještaj o načinu finansiranja. Ministar je ugrubo rekao da će biti iz Budžeta, međutim tamo su naše dileme na Komisiji bile o učešću, znači, općina koje imaju centre na svojoj teritoriji i o učešću općina koje nemaju, znači, na svojoj teritoriji centre, ali o njihovim obavezama u finansiranju ovih ... rada ovih centara. Pa eto, ako ministar ima potrebe da nam još detaljnije nešto kaže o finansiranju, ako ne, pređimo na raspravu.

PREDSJEDAVALJUĆI

Hvala. To je stav u ime Komisije. Onda, dakle, otvaram raspravu po ovoj tački dnevnog reda. Ko želi učestvovati? Poslanik Hasan Handžić, a poslanik Zaim Imamović-Kaze i poslanik Asim Čajlaković.

HASAN HANDŽIĆ

Gospodine predsjedavajući, kolege, gosti, obzirom da se rad ... da se radi o jednom vrlo, vrlo specifičnom Prijedlogu Odluke koji tretira vrlo specifičnu kategoriju krajnjih konzumenata, kako djece tako njenih roditelja. Ja sam ovdje posebno oprezan obzirom da za sve ono što je bitno na ovoj Skupštini, znači sve dokumente, informišem se i iz baze koje se neposredno ovo tiče, predlažem da danas raspravljamo o ovom aktu, ali u formi nacrta. Obrazloženje je sljedeće: Obzirom da nisu prilikom izrade ovog dokumenta u formi Prijedloga uvaženi krajnji konzumenti, ponovo ponavljam, odnosno institucije po općinama, nacrt ... forma nacrta ovog dokumenta bi omogućila da se ide u javnu raspravu, da oni budu uvaženi, da daju svoje sugestije i prijedloge i primjedbe i da kao konačnicu ... u konačnici da dobijemo jedan kvalitetnije dokument koji će biti zadovoljavajući dokument za sve one, a posebno za roditelje i djecu. Znači, za roditelje i djecu. Ono što bude prihvatljivo krajnjem konzumentu u principu, a ovdje posebno jednoj vrlo specifičnoj kategoriji, djeca sa posebnim potrebama i roditelji koji imaju težinu odgoja, dodatnu težinu odgoja te djece. Treba da dobro razmislimo. Treba da napravimo vrlo oprezno ovaj dokument i treba ga ... da ga usvojimo onakvog kakav paše njima. Evo toliko. Još jednom predlažem da krenemo u ... u ... u fo ... u raspravu u formi nacrta, ukol'ko je to

moguće, a mislim da je moguće. Sekretaru, jel' tako? Da omogućimo onima kojih se ovo neposredno tiče da ... da kažu svoje ...

PREDSJEDAVAJUĆI

Hvala kolegi, ali da bi odmah raspravu usmjerili u smjeru koji je odgovarajući, ja molim sekretara Skupštine da za govornicom, zvanično, kada je u pitanju forma Prijedloga Odluke kaže koja je uobičajena praksa kada je u pitanju pretvaranje, odnosno, prijedlog da se pretvori u formu Nacrta.

IBRAHIM AVDAGIĆ, SEKRETAR SKUPŠTINE

Ja vas sve selamim i pozdravljam. Znači, po članu 152. Poslovnika Skupštine donošenje odluka se vrši po proceduri kao s donošenjem zakona s tim što se za kod donošenja, kod predlaganja odluka ne ... ne pravi nacrt, nego odmah prijedlog. Znači, redovna procedura je prijedlog. Međutim, ovdje kaže: „u postupku donošenja ovih akata ne izrađuje se nacrt ukoliko Skupština drugačije ne odluči.“ Znači, postoji pravni osnov u Poslovniku da Skupština odluči da se ipak ovaj Prijedlog Odluke razmatra u formi nacrta. To bi tehnički bilo izvodljivo da predsjedavajući predloži zaključak Skupštini da se ova Odluka razmatra u formi nacrta. Ukoliko Skupština prihvati taj prijedlog, donese taj zaključak, znači, vodila bi se rasprava kao u formi nacrta. Eto toliko, hvala.

PREDSJEDAVAJUĆI

Hvala na ovom tumačenju. Dajem riječ po redosljedu poslaniku Zaimu Imamoviću-Kazetu. Ja Vas oslovljavam s nadimkom iako nisam obavezan.

ZAIM IMAMOVIĆ

Ma nema veze, predsjedavajući, Vi ste moj prijatelj, Vi to možete i ja Vas uvažavam.

PREDSJEDAVAJUĆI

Ne moramo sad privatno ...

ZAIM IMAMOVIĆ

Nema veze, Vi ste moj prijatelj.

PREDSJEDAVAJUĆI

Isto mogu potvrditi.

ZAIM IMAMOVIĆ

U potpunosti podržavam gospodina Handžić Hasana ovo što je sada rekao i ja ću glasati za to. To znači da ne ide danas ... nego da ide u formi prijedloga. Ovo u potpunosti isto i podržavam Odluku o osnivanju ove Javne ustanove jer i sami vidite da je to ustanova za Centar za djecu i odrasle osobe sa posebnim potrebama. Ovdje bih pitao ministra tri stvari. Prvo, pitam ministra da li je kontaktirao lokalnu zajednicu što se tiče ove Odluke i šta kaže lokalna zajednica? Da li su oni za to? Takođe, pitam ministra koliko će koštati ova Javna ustanova, odnosno, mislim koliko će trebati novca za 40 novouposlenih plus pet u Upravnom odboru i plus tri u Nadzornom odboru? Ja sam ekonomist i po mom proračunu bi to bilo negdje između milion i po do dva miliona maraka. Takođe, predlažem da se ova Odluka prolongira na jedno određeno vrijeme, bar za 90 dana ili 120 dana i da se to uradi onako kako treba. A uglavnom ću podržati ovo. Ovo treba da se napravi i stojim iza toga. Hvala lijepa.

PREDSJEDAVAJUĆI

Hvala kolegi Kazetu. Poslanik Asim Čajlaković, izvolite. Ministre, hoćemo li dati prednost poslaniku, pa vi možete onda ...?

ASIM ČAJLAKOVIĆ

Dame i gospodo, poslanice i poslanici. Prije svega, naravno, naj ... ovdje u ovom slučaju najteže je onima koji očekuju ovu pomoć i ne daj Bože koji zavise od onoga što mi trebamo za njih da uradimo. Sva ta patnja koju imaju, ja im se izvinjavam. Da bi došli do boljeg rješenja, ja ću iznijeti svoje mišljenje i svoju raspravu na ovaj Prijedlog bez toga da umanjim njihovu patnju i da nisam spreman da im pomognem, da se odmah to razumijemo. Međutim, prije svega, poštujući određene propise i zakone, ovaj Elaborat koji je rađen nije urađen sukladno aktima koji se trebaju raditi, posebno u dijelu ekonomske opravdanosti jel' mi ne znamo iz ovog Elaborata, koji su radili jedan pravnik, dva socijalna radnika, šta je ta ustanova i koliko će to imati implikacija na buduću Budžet, kol'ko će koštati, ko šta preuzima itd. Znači, ovdje ni jedan ekonomista nije izračunao 41 uposleni radnik, koliko to košta Budžet Zeničko-dobojskog kantona, kako će se obez ... obezbijediti sredstva itd. Znači, samim tim ovaj Elaborat se može smatrati, ovaj, nepotpunim, samo u tom dijelu, da ne govorim o ostalim stvarima. Sredstva za rad Centra obezbjeđuju se iz Budžeta osnivača i po osnovu ugovora sa općinama, odnosno sa lokalnom zajednicom. Međutim, član 21. stav 2. Zakona o organizaciji organa uprave u Federaciji BiH, „Službene novine Federacije BiH“, broj: 35/05, propisano je da ako se za provođenje zakona ili drugog propisa koji se predloži moraju osigurati određena finansijska sredstva, organi uprave obavezni su u obrazloženju tog propisa iskazati orijentacijski iznos finansijskih sredstava, a koja su potrebna za njegovo izvršavanje i određen ... odrediti izvore iz kojih treba da se osiguraju ta sredstva. Ni u jednom dijelu ovdje toga nema. Sve ostalo što bih diskutovao bilo bi suvišno. Znači, ni u jednom dijelu nema izračuna 41 uposleni, ni u jednom dijelu nema, znači, mi kršimo odmah zakon ako ovo ovako donesemo. Mi nismo uopšte angažovali ni stručno ekonomsko lice, čak vidim ovdje u ... poštujući ove ljude koji su ovo radili sa stanovišta svoje struke koji su to fenomenalno uradili, međutim sve nešto okolo, Elaborat treba ovoliko, treba ovako. Zašto nisu rekli to će Budžet, gospodo, koštati na godišnjem nivou milion maraka. Nećemo trošiti na ovoj stavci više milion nego ćemo to prebaciti ovamo. Možemo li mi to? Šta ćemo uraditi sa aktuelnim centrima za socijalni rad? Šta ćemo sa njima? Hoćemo li ih zatvoriti? Je li ovo paralelizam u rješavanju institucija ili je uvođenje u ove institucije u okviru Centra za socijalni rad itd., itd. Mislim da ovaj Elaborat apsolutno je neprihvatljiv sa stanovišta ... ja samo govorim sad o ekonomskoj opravdanosti, jel' nije rasvijetlio niz tačaka koje bi bile jasne i precizne da bi ova Odluka dobila danas snagu. Slažem se sa gospodinom Handžićem da ovo pretvorimo u nacrt, da stvarno tražimo od Ministarstva i ljudi koji su radili da se uključe, da tačno znamo da li je to samo 49.500,00 osnivački ulog, koliko će nas koštati uposlenici, osnivanje, troškovi itd. Prema mojoj računici, grubo onako, ne bih želio da se ona rabi, da se zloupotrebljava, jeste milion maraka. Hvala.... Samo zaposlenici i održavanje.

PREDSJEDAVALJUĆI

Hvala kolegi Čajlakoviću. Obzirom na daljni tok rasprave da znamo kako ćemo je usmjeriti, ja molim ministra Čurića da nam pomogne, obzirom da su prethodni poslanici izrazili potrebu da se ova Odluka ipak vrati iz forme prijedloga u formu nacrtu. I čuli smo mišljenje sekretara vezano za poslovničko tumačenje.

IVICA ČURIĆ, MINISTAR MINISTARSTVA ZA RAD, SOCIJALNU POLITIKU I IZBJEGLICE

Zahvaljujem, predsjedavajući. Dakle, tu je postavljeno već nekoliko pitanja koja su već otvorila raspravu. Ja mislim da, ovaj, moj prijedlog i stav Ministarstva i Vlade jeste da ne ide u Nacrt nego da se o ovom raspravlja kao Prijedlogu. Ja sam, ovaj, spreman na ova pitanja koja su već postavljena dat' odgovore i odgovori se sadrže i u onome Elaboratu koji neko doživljava kako ga doživljava, ali mi ne pravimo ovim Odlukom, ovaj, d.o.o. profitabilna društva, mi pravimo socijalnu ustanovu. Dakle, socijalna ustanova prvenstveno ima aspekata ... aspekt, Elaborat je pokazao socijalni aspekt, društveni aspekt, a ekonomski aspekt ... ekonomski aspekt je pokazan kroz ove pokazatelje u kojima se ... u kojima stoji koliko se sad trenutno troši novaca na dnevne

centre koji funkcioniraju u okviru nevladine organizacije koja se zove „Humanost“. Dakle, mi imamo situaciju da financiramo dnevne centre kroz aktivnosti Udruženja „Humanost“ koji je produžena ruka njemačkih donatora koji su participirali u izgradnji ovih ... ovih dnevnih centara. Mi imamo potpisan aneks ugovora ... aneks ... aneks o projektnom funkcioniranju ustanove Dnevni centar u Zenici je već istek'o ... ugovor je istek'o. Mi imamo potpisan aneks koji je na snazi do 6-og mjeseca. To smo njemačkim donatorima, ovaj, u dogovoru s njima smo, ovaj, napr. ... to u 10-om mjesecu dogovorili i oni su to prihvatili, takav oblik. Tu su bili predstavnici njemačke ambasade koji su s nama zajedno se dogovorili da se na ovakav, ovaj, način prihvati daljnje funkcioniranje ... osigura funkcioniranje ovih dnevnih centara. Dakle, mi imamo nešto što je fakat, što je ... što je naša stvarnost. Mi trošimo 556.393,00 KM za smještaj u dnevne centre godišnje i to je ono što je činjenica i plus temeljni kapital od 59 ... 49.000,00, znači, to je negdje nekih 600-610.000,00 maraka planiranih sredstava koji su sasvim, sasvim dovoljne za funkcioniranje ove ustanove u okviru ovih dnevnih centara koji su sad aktualne, koje mi sad imamo sa tendencijom da se otvori dnevni centar u Tešnju i da se otvori u Olovu kao isturena odjeljenja. Sistematizacija koja je napravljena napravljena je ova kojom vi baratate 40 i nešto zaposlenih, to nije sistematizacija koja poteže sad zapošljavanje novih ljudi nego je to sistematizacija koja će u budućnosti biti potrebna za ... za funkcioniranje svih ovih isturenih odjeljenja i Tešnja i Olova, ovaj, sa ovim dnevnim centrima koji će od iduće godine u Visokom, takođe, sa projektnog finansiranja doći u okvire ustanove i udruženja ... cen ... Dnevnog centra u Maglaju koji već funkcionira kao javna ustanova kojoj je osnivač Udruženje „Humanost“. Dakle, mi imamo jednu heterogenu situaciju koju moramo sad staviti u jedan realan zakonski, institucionalni okvir za iste novce, za iste pare koje sad trošimo. Možda čak i više korisnika će biti i moći, ovaj, koristiti usluge tih dnevnih centara, ne možda nego sigurno sa ovim istim raspoloživim sredstvima. Dakle, jedan menadžment sa sjedištem u Zenici, sa isturenim odjeljenjima u Maglaju, Visokom i u dogledno vrijeme Tešnja i Olova zbog daljine, zbog prijevoza, zbog ovoga ... tih teškoća koji sve iziskuje taj ... taj prevoz. U ovome dokumentu, znači, vidjeli ste koliko se to po kojem centru troši novaca do sada u 2012. godini, to je isto tako i u 2013. I da se ne bi došlo u situaciju da se ... da ti dnevni centri stanu, da ne funkcioniraju nikako, mi smo se odlučili da idemo na osnivanje ustanove koja će biti u ... pod nadzorom i Vlade i Ministarstva, koja će funkcionirati u okviru zakona. Mi sad imamo situaciju da nam nevladin sektor pokušava i baviti se, ovaj, djelatnostima iz socijalne zaštite, a da Vlada tu bude partner samo sa novcima što je neprihvatljivo. Znači, mi imamo zakonsku obavezu po Ustavu Bosne i Hercegovine, po Ustavu Federacije, po Međunarodnim konvencijama, po Ustavu Kantona, po zakonima koje smo donijeli ovdje u Zeničko-dobojskom kantonu da se socijalnom zaštitom bavimo, posebno socijalnom zaštitom ove populacije. Prema tome, ovo je nešto na čemu smo mi radili, nešto što smo mi sagledali sa partnerima koji su bili donatori, koji su taj ... te projekte vodili, na projektnim osnovama, oni su iscrpili svoje kapacitete i potencijale i oni to više raditi ne mogu. Mi novce dajemo, mi imamo ugovore potpisane za ove dnevne centre, mi to ispo ... ispo, ovaj, svoje obaveze ispunjavamo. Međutim, nevladine organizacije kao nevladine organizacije iz Udruženja „Humanost“ prošle godine, pardon, imalo problema u funkcioniranju iz razloga što tamo imaju uposlenike po ugovoru o djelu, što ti uposlenici onda utužuju ustanovu, odnosno Udruženje u kojem rade, pa onda dolazi do blokade računa, sudovi presuđuju u njihovu korist, dolazi do blokade računa gdje oni svoju osnovnu funkciju ne mogu da obnašaju. To smo imali prošle godine, skoro cijelu godinu taj problem, tek se ... tek se deblokirao račun negdje pred kraj godine. To je jedan od ... od ... od ... od razloga zašto se mora osnovat' ustanova koja će funkcionirat' na temelju zakona ove države i ako će se budžetski novci trošiti, a troše se za tu vrstu djelatnosti i doznačavaju se nevladinom sektoru, odnosno udruženjima, ovdje u konkretnom slučaju u ove tri ustanove, Udruženju „Humanost“, ovo je, ja mislim, najispravniji i jedini ispravan put kojim trebamo ići da to ... da to završimo ... da to dovedemo u red. Pitanje koje se odnosilo na lokalnu zajednicu, općine imaju potpisan ugovor o fin ... o učešću lokalnih zajednica o finansiranju. Općine imaju potpisan ugovor tripartitni, sa Ministarstvom o sadašnjem sufinansiranju ovih dnevnih centara. Iskren ću biti, trećina općina to poštuje, dvije trećine općina to ne poštuju, taj ugovor o finansiranju. To smatraju eto tako proizvoljnim, nekad hoće nekad neće, mada su potpisali ugovor sa Ministarstvom i sa

Udruženjem „Humanost“, ali evo, opet je finansiranje spalo na Ministarstvo i na Kanton i na budžet ovog Kantona i to mi izvršavamo i uspjevamo isfinansirati' sve ove potrebe. Druga stvar, što se tiče ovih objekata koji su ... koji se koriste, koji će se koristiti, kaže: „Vlasnici objekata su navedene općine, a za sve objekte ugovorena obaveza da će biti namjenski, trajno korišteni za pružanje usluga za djecu i odrasle osobe s posebnim potrebama. Kanton i općine su se zajednički obavezale da će se ova obaveza i realizirati.“ Dakle, mi smo to potvrdili u 10-om mjesecu prošle godine predstavnicima američke ambasade koji su bili kod nas ovdje na sastanku i rek'o sam, dakle, osnovna sredstva ... finansijska sredstva za uplatu osnovnog kapitala Javne ustanove planirana su u visini 49.950,00 KM budžeta Zeničko-dobojskog kantona za 2014. godinu, ovaj, i općine su dužne ove objekte dati u funkciju. Ja sam lično razgovarao sa predstavnicima općina na čijim se teritorijama nalaze objekti. Oni su sukladno ovome tripartitnom ugovoru koji su potpisali, član 13., obavezni da te objekte stave u funkciju ove ... ove populacije. Znači, u članu 13. to fino piše: „po završenoj izgradnji predmetnih objekata, Udruženje se obavezuje da će iste predati u namjensko korištenje vlasniku, odnosno općini. Po okončanju zgrade objekta općine su kao vlasnici objekta, stiču sva prava vlasnika vezana za izgradnju objekta“ i dalje, u trećem pasosu stoji: „Ministarstvo i općine se obavezuju da će objekat namjenski koristiti i isti trajno staviti u funkciju osnovne namjene kako je to utvrđeno projektom.“ Dakle, projekat je istek'o, projektno finansiranje završeno za sve centre. Maglaj je prvi započeo, on je dole fun ... funkcionalna Javna ustanova, međutim dole je osnivač Javne ustanove Udruženje. Udruženje je osnivač. Evo tu su predstavnici Udruženja, prihvatilo se da bude osnivač zato što to u datom momentu nisu htjeli ni predstavnici općine da budu osnivači ni predstavnici Kantona nisu htjeli da budu osnivači. I onda se nevladin sektor, naravno, pobrin'o i osnov'o je ustanovu. Ta ustanova funkcioniра kao takva u otežanim uslovima obzirom da kao nevladina organizacija ima problema kojih ima, koje sam ja maloprije naveo. Tako dolazimo u situaciju da moramo preuzeti, ovaj, dnevni centar u Zenici, nemamo zainteresiranog partnera da preuzme, da osniva ustanovu, a projektno finansiranje je isteklo. Partner iz Njemačke se ... se povukli, oni su svoje odradili i hvala im, pomogli su, sufinansirali su, investirali su, pomogli su dvije godine u edu ... u ... u ... u osposobljavanju ustanove, ona sad funkcioniра, radi, međutim, daljnje funkcioniranje jedino moguće u okviru zakona, a to je ono što smo mi predložili. Ista situacija nas čeka za 7-8 mjeseci, odnosno, 9 u Visokom, isto tako ugovor na ... ugovor ... ugovorno finansiranje ističe i mora se preuzeti na institucijalni način. Dakle, sredstva ne ... ne trebaju nova, dodatna, nego što se sad trenutno angažirana, osoblje koje sad radi u dnevnim centrima će biti angažirano, biće preuzeto u saradnji sa Udruženjem „Humanost“ koji su sad nositelji svih tih aktivnosti. Njihovo je osoblje tamo angažirano u ... dakle, u ... u ... uz suglasnost, ovaj, partnera iz Njemačke i, naravno, našu suglasnost kao Ministarstva kad su se, ovaj, dnevni centri otvarali. Dakle, to isto osoblje će samo preuzeti daljne aktivnosti oko ... oko ... oko, ovaj, pružanja tih usluga u tim dnevnim centrima. Ali, kažem ovog puta, još jedanput ponavljam, sa jednog mjesta, pod nadzorom, u okviru zakona, sa uštedama, mi ćemo, ako ovo se ne prihvati, onda mi imamo situaciju da će imati tri menadžmenta, jedan u Maglaju, jedan u Zenici, jedan u Visokom, tri uprave, itd., itd. I pitanje je onda koliko će to sve koštati. Puno više nego ovo što će sad koštati. O milionu o kojem pričate nema govora. Dakle, ja sam rek'o kol'ko se troši novaca za to, to, to, to je toliko, tol'ko će se trošiti sad u ovome momentu. Iduće godine, ako se nekad u budućnosti, što je tendencija, da će biti povećanje broja korisnika, jer mi smo imali prije godinu i po dana-dvije godine 620 i nešto, sad imamo 650 i nešto ovih osoba koje su potencionalni korisnici tih usluga. Dakle, broj se povećava. Djeca koja su sad djeca iz godine u godinu prerastaju tu dobnu ... tu dobnu granicu, postaju odrasle osobe, a mi centara za odrasle osobe nemamo. I sad imamo problem tu, evo Udruženje „Svjetlost“ zna da smo se i prošle godine s tim, ovaj, borili i da smo imali problema oko toga kako ... kako osigurati prostor i način za dnevni boravak odraslih osoba ovog dnevnog centra i nismo to imali regulirano i nemamo još uvijek, a ovim, ovom Odlukom, ovim Elaboratom, ovom ustanovom, javnom, kantonalnom sve se to postiže. Ja vas molim da to danas evo ako treba još raspravu otvorimo, ali da je ne otvaramo u formi nacрта nego da to ide u okviru u formi prijedloga i da se danas donese ova odluka i da mi možemo aktivno, u okviru zakona i ovlaštenja koja imamo pristupiti realiziranju ... realizaciji svih ovih aktivnosti. Obzirom da naši partneri iz Njemačke dolaze ovdje sljedeće sedmice, u nadi da smo ... da ćemo mi ovu Odluku

danas donijeti, pa da se oko daljnjih aktivnosti i oko daljnjih akcija koje oni predlažu kao ... kao partneri, kao nevladin sektor u ovome svemu dogovorimo. Naravno, i sve ostale nevladine organizacije koje imaju želju i volju da učestvuju u ovome, vrata su otvorena k'o i do sada, svi mogu da ... da ... da budu ... da budu partneri i pozivamo ih da budu partneri i želimo da budu partneri i da budu ... da unapređuju standard i uslove života i boravka u ovim centrima za sve ove korisnike koji će u budućnosti koristiti naše usluge.

PREDSJEDAVALAČI

Oprostite, molim vas, nemate pravo! Molim vas, nemate pravo! Izvinite, morate poštovati kodeks ponašanja u ovom objektu. Izvinite, molim vas! Suzdržite se. Dobit ćete riječ ako ste se prijavili. Izvinite.

IVICA ĆURIĆ, MINISTAR MINISTARSTVA ZA RAD, SOCIJALNU POLITIKU I IZBJEGLICE

Evo, dakle, to je to što sam htio reći, ovaj, za ... za ... za naše partnere koji dolaze sljedeće sedmice ovdje da se dogovorimo o daljnjim aktivnostima. Ja sam rekao, ovaj, pozivam i sve ostale nevladine organizacije da se uključe, da budu partneri, da budu, ovaj, ... Mi moramo biti, po zakonu, nositelji svih ovih aktivnosti. Nas zakon obavezuje, a svi ostali koji kroz nevladin sektor žele djelovati, žele pomoći dobro su došli i mi ćemo surađivati i želimo surađivati i poboljšavati uslove i standard življenja za sve ove osobe koje će živjeti u ovim i boraviti u ovim dnevnim centrima. Toliko. Ako još neko nekih pitanja ima, ja sam spreman odgovoriti, međutim, volio bih, kažem još jednom, predlažem vam da danas ne raspravljamo o ovome u formi nacarta, gubimo vrijeme. Otiče to u daleko, neće se ništa ... ništa se neće ... ništa se neće, bojim se, promijeniti, a izgubit ćemo vrijeme obzirom da nam aneks ugovora koji imamo sa Udruženjem „Humanost“ vezano za Dnevni centar u Zenici ističe u šestom mjesecu. Hvala vam.

PREDSJEDAVALAČI

Hvala. Molim vas, ja sam zabilježio ko je u međuvremenu digao ruke. Međutim, mi od ovoga trenutka moramo znati i moramo donijeti ... Šta ste vi htjeli? Molim vas, sjedite! Ne možete ... Možete predati ovdje sekretaru, pismeno. Eto. Lijepo sam pročitao. Moramo donijeti odluku ovdje o čemu razgovaramo, o prijedlogu ili o nacrtu Odluke. Pošto je predlagač ostao pri stavu da je ovo Prijedlog, a nekoliko poslanika je predložio, ja ću sada nešto isčitati i mi moramo se izjasniti kao Skupština o tome zaključku i dalje voditi raspravu. Dakle, vezi prijedloga za razmatranje navedene Odluke, dakle, u formi Nacrta, napominjem da za to postoji pravni osnov, u odredbi člana 152. stav 1. Poslovnika Skupštine Zeničko-dobojskog kantona, u kojoj je propisano da se, citiram, „**donošenje odluka, deklaracija, rezolucija, preporuka, strategija i analiza vrši po odredbama ovog Poslovnika, koje se odnose na postupak za donošenje zakona, s tim što se u postupku za donošenje ovih akata ne izrađuje nacrt akta, ukoliko Skupština drugačije ne odluči**“..., završen citat, a što znači da je redovna procedura donošenja navedenih akata, (među kojima i Odluka), njihovo dostavljanje u skupštinsku proceduru u formi Prijedloga ali se daje ovlaštenje Skupštini da drugačije odluči, odnosno da odluči da se navedeni akti, (među kojima i Odluka), razmatraju u formi Nacrta.

S tim u vezi, trebam dati na izjašnjavaње Skupštini ovaj prijedlog koji se formuliše u formi zaključka o kojem se Skupština treba izjasniti, pa ako isti Skupština prihvati, odnosno ako donese predloženi zaključak, tada bi se ova Odluka razmatrala u formi Nacrta i o Nacrtu navedene Odluke odmah bi se vršila rasprava na ovoj sjednici Skupštine.

Imajući u vidu naprijed navedeno, predlažem Skupštini slijedeći:

ZAKLJUČAK

Skupština Zeničko-dobojskog kantona je odlučila da se Odluka o osnivanju Javne ustanove Centar za djecu i odrasle osobe s posebnim potrebama Zeničko-dobojskog kantona razmatra u formi Nacrta i da se o istoj vrši rasprava na 54. sjednici Skupštine, dana 13.03.2014. godine.

Otvaram raspravu po predloženom zaključku. Izvolite, predsjednik Kluba Saveza za bolju budućnost, poslanik Adnan Jupić.

ADNAN JUPIĆ

Fala predsjedavajući, evo i ja ću iskoristiti priliku da pozdravim sve koje učestvuju u radu današnje sjednice. Pošto se ovdje radi o novim momentima, ja ne bih diskusiju otvar'o nego par minuta pauze predložio da se usaglasimo.

PREDSJEDAVAJUĆI

Samo konkretno precizirajte.

ADNAN JUPIĆ

5 minuta.

PREDSJEDAVAJUĆI

Hoće li biti dovoljno?

ADNAN JUPIĆ

10.

PREDSJEDAVAJUĆI

Evo u 13 sati, na prijedlog predsjednika Kluba nastavljamo rad. Molim vas da zauzmete svoja mjesta, poslanike i uvažene goste. Molim predsjednika Kluba SBB-a, poslanika Adnana Jupića da saopšti stav Kluba pošto je na njihov zahtjev zatražena desetominutna pauza, izvolite.

ADNAN JUPIĆ

Hvala predsjedavajući. Evo mi smo pauzu iskoristili za ... za usaglašavanje. Imali smo prijedlog, znači, da se rasprava nastavi do kraja, da čujemo i goste koji su direktno, trebaju biti, znači, uključeni u ovo. Međutim, to poslovnički nije bilo moguće, tako da smo mi zauzeli stav, najbliži smo tome da se razgovara u formi nacrt, šta je ... što je moguće kraćim rokom, 15-ak-20 dana, znači, da se da prilika svakome i da što prije to dođe kao tačka dnevnog reda u formi prijedloga. Hvala.

PREDSJEDAVAJUĆI

Hvala. Riječ želi i predsjednik Kluba SDP-a, poslanik Senaid Begić, izvolite.

SENAID BEGIĆ

Poštovani predsjedavajući, pozdravljam vas, takođe sve kolege zastupnike i sve prisutne ovdje u ovoj sali. Ja bih, takođe, da samo kratko iznesem, ovaj, stav Kluba nakon izlaganja, stvarno razumnog izlaganja i jasnog izlaganja od strane ministra, s jedne strane i uvažavajući u posljednjih (ne razumije se), znači, pojedinačno što od udruženja, što od aktivista udruženja. Evo mi smo zajedno na sličnom fonu kao i što je rekao predsjednik Kluba SBB-a, doktor Jupić, mišljenja da prvenstveno radi ovih ljudi koji su intervenisali u međuvremenu do današnje sjednice. Naravno da će to imati jednu određenu cijenu u smislu ne usvajanja veoma potrebnog dokumenta danas. Ovaj, smatramo da u što kraćem mogućem roku trebamo smanjiti raspravu i da ukoliko je to moguće na prvoj sljedećoj sjednici Skupštine budemo u situaciji da ... da ... da se o svemu tome izjasnimo.

PREDSJEDAVAJUĆI

Hvala. Evo kol'ko sam čuo predsjednike, riječ želi i predsjednik Kluba SDA, poslanik Ibrahim Plančić, izvolite.

IBRAHIM PLANČIĆ

Zahvaljujem gospodine Radišiću. Pa, evo, mi se na ... na samom početku, dakle, i ove rasprave nismo očitovali na ... naravno, naš Klub je već bio donio ovakvu odluku, dakle, čekali smo argumente koji ... koji bi, onaj, možda govorili drugačije. Međutim, jasno je iz svega ovoga da ... da ovako značajan dokument i osnivanje jedne ovakve javne institucije na području Zeničko-dobojskog kantona ipak zahtjeva malo šire konsultacije, prije svega, mi smatramo, mišljenje lokalnih zajednica i onih kojih direktno ovo ... ovo tiče. U predloženim dokumentima to ... to nam nije validno prezentovano i zbog toga smatramo, evo, da je ova inicijativa, da se ovaj dokument zahvaljujući ovoj poslovničkoj odredbi članom 152. pretvori u nacrt, zaista, da je dobra, da je kvalitetna i slažemo se da ukoliko je moguće zbog ovih razloga da ona što kraće traje. Međutim, čini mi se da vremenski termin ispod 30 dana nije realno provodiv za sve općine Zeničko-dobojskog kantona, jer mi smatramo da ovo treba da se javno raspravi u svim općinama Zeničko-dobojskog kantona i sa svim zainteresovanim stranama. S toga će Klub zastupnika SDA podržati ovu inicijativu da ovaj dokument odnosno osnivanje ove javne ustanove ide u formi nacrt. Zahvaljujem.

PREDSJEDAVALJUĆI

Dobro. Ja mislim da mi imamo uslove da se sada izjasnimo vezano za raspravu u formi nacrtu u skladu sa zaključkom koji sam pročitao, a u okviru rasprave dat ću svima riječ koji su se prijavili i uvažavam da ste se kolega Imamoviću prijavili kao i kolega Čajlaković i kolega Bajrić, ali prvo da se, dakle, odredimo prema zaključku koji sam pročitao i evo dozvolite mi da zaključim raspravu i dajem na izjašnjavanje predloženi zaključak. Ko je za ovakav Zaključak? Mislim, govorimo o formi nacrt. 31. Ko je protiv? Ima li uzdržanih? Dakle, dva uzdržana.

Konstatujem da je Skupština Zeničko-dobojskog kantona većinom glasova, sa 31 glasom «za», bez glasova «protiv» i sa 2 «uzdržana» donijela Zaključak u predloženom tekstu.

Sada raspravljamo po ovoj tački dnevnog reda kao o Nacrtu Odluke o osnivanju Javne ustanove Centar za djecu i odrasle osobe s posebnim potrebama Zeničko-dobojskog kantona.

Kako sam ja evidentirao, ja imam ponovno prvo poslanika Asima Čajlakovića, zatim Jasmina Imamovića i Zaima Imamovića Kazeta, prijavljene do sad i Samir Bajrić.

ASIM ČAJLAKOVIĆ

Dame i gospodo, s obzirom da je rasprava dobila drugu formu, da sada raspravljamo o onome što bi bilo najbolje da ovaj centar ... dnevni centar zaživi, ovaj, predlažem Ministarstvu, sluš'o sam uvaženog ministra Ivicu Čurića koji je govorio i o ekonomskim pokazateljima, ja ipak se ne slažem. Tamo nisu iskazane naknade i plaće uposl ... zaposlenika po kojem kofi ... koeficijentu će se obračunavat', koji će status ti zaposlenici imati s obzirom da rade u javnoj instituciji, da su automatski budžetski korisnici puta 41 lice na nivou kantona puta doprinosi i ostali troškovi. To je, ministre, uz svo vaše uvažavanje, ipak milion maraka, ali sad to nije predmet rasprave, predmet rasprave tražimo da se u Elaboratu iskažu detaljni ekonomski pokazatelji kao i finansiranje. Šta to znači? Sukladno Zakonu, koji sam pročitao, o budžetima Federacije, o budžetima Federacije da kažete sa kojih kodova će u okviru Ministarstva za socijalna pitanja biti umanjena stavka i pridodata stavki za finansiranje ovog dnevnog centra. Takođe, u Elaboratu dajte osvrta a javna rasprava će pokazati da li su zaista općine spremne da daju tu imovinu u ovakav vid ili ćemo imati situaciju kao što smo imali skoro u nekim ustanovama, osnivamo Javno preduzeće Dom penzionera sa medicinskom njegom, imali smo jedan Dom penzionera itd. Pokazalo se dobro-ne dobro, vrijeme će pokazati. Da ne bi to ponavljali, imovina jednog lica, zemlja drugog, preduzeće trećeg itd. Ja ne zagovaram takav stav. Ja zagovaram stav da to ta ... na naj mogućii kvalitetniji način riješimo, da dođemo najboljeg rješenja, da stvarno korisnici tih dnevnih centara budu, ovaj ... Druga stvar, institucije, da neko tako preuzima olahko poslove u državnim institucijama bez javnog poziva, stručnosti, itd. I to se ne slažem. Nisam tog zagovornik da nekoga jednostavno tako udomljujemo, ali zahvaljujem se i podržavam tu humanost ljudi koji su tamo radili. Mor ... može im se dati, vjerovatno, neki prioritet. U svakom slučaju oni to znaju da rade i kako će to raditi itd., ali sukladno Zakonu o budžetima i sukladno pokazateljima šta tačno nas to košta, mora biti iskazano, inače ja nikad neću glasati što ne znam

šta će od koga ... Mi imamo budžete kakve imamo. Imamo problema vidite kakvih ... kakva inače imamo budžetima i sad jednostavno ne možemo isplatiti porodilje, ne možemo isplatiti druga socijalna davanja, a tako ... bez zareza i tačke, eh sad ćemo još novu instituciju, pa ćemo i ja i vi ministri, ja ću otići vjerovatno odavde u oktobru ili prije ako to, ovaj, građani većina kaže, ...

PREDSJEDAVAJUĆI

Većina nas.

ASIM ČAJLAKOVIĆ

... većina nas hoće ili neće to je stvar građana i vi vjerovatno ko zna hoćete li biti ministar, ostat će problem nekom drugom. Ostat će problem građanima kvalitetno ne riješen, pa će onda neko optuživati ko je glas'o za ovo. Ja to ne želim u tome da učestvujem. Znači, vaši pokazatelji koje ste vi ovdje iznijeli nisu ipak uvjerljivi da bi ja, ovaj, rek'o da to treba ... da je to trebalo glasati. Drago mi je što smo se isto prepoznali i dajte da javnu raspravu stvarno obavimo sa lokalnim zajednicama i s ovim ljudima koji su ispred udruženja, da oni kažu, oni isto, takođe, znaju najbolje šta ih pati itd. Hvala vam lijepa.

PREDSJEDAVAJUĆI

Ja ću samo zamoliti pošto smo već ovo pretvorili u vid nacrtu da ako je ikako moguće, predugo se patimo, inače, mučimo, crpimo, ako je ikako moguće da budemo koncizni da skratimo ovo. Jasmin Imamović, poslanik Jasmin Imamović, izvolite. Ako možete uvažiti, molim vas, jer imam i pet gostiju koji su prijavljeni.

JASMIN IMAMOVIĆ

Zahvaljujem. Neću, onaj, dugo. Dakle, evo drago mi je što je donesena odluka da, dakle, iz faze prijedloga pređe u fazu nacrtu s obzirom da su to evo i klubovi zahtijevali i Skupština, a zahtijevala su to i udruženja i ja sam mislio da će možda udruženja prva da govore, s obzirom da su one najviše zainteresovana, dakle, to su roditelji djece koja imaju posebne potrebe i oni svakako najbolje znaju i znaju šta ih najviše tišti i ako se ne varam, mi smo u proteklom periodu, ova Skupština je donijela i Zakon o javnom i privatnom partnerstvu, dok je ministar spomenuo ovlašt udruženja i ne smatra ih, po meni, dakle, ne smatra ih dovoljno jakim i bitnim sagovornikom, a smatram da su oni u ovom momentu najbitniji. Dakle, ova udruženja su najbitnija. Imamo, ja sam spominjao, nevladine organizacije, imamo ih svakakvih i ovakvih i onakvih, ali ovo su udruženja koja ... kojima je u interesu s obzirom da su to roditelji djece i oni najbolje osjećaju te tegobe i svoje djece i kol'ko oni moraju da rade oko djece i kol'ko vremena potroše da oni imaju najbolju moguću, dakle, njegu. Smatram da je se prebrzo treb ... željelo doći do ove Odluke, važne odluke o formiranju ustanove koja je svakako neophodna i svakako evo smatram da će i udruženja o tome nešto više reći. Općine takođe imaju, dakle, inicijativu, imaju potrebu za osnivanje ovih dnevnih centara, ako se ne varam, i Općina Zenica je radila na tome sa Kantonalnim udruženjem „Dlan“. Dakle, znam da je aktivno i „Mala sirena“ iz Zavidovića. Postoje još druga nevladine organizacije koje veoma kvalitetno rade i sigurno su ispred Vlade, evo i Vlade Zeničko-dobojskog kantona kažu entuzijazma i koliko rade i koliko ideja. Ja sam postavljao i određena pitanja Vladi Zeničko-dobojskog kantona zašto ne ispunjavaju obaveze koje su preuzeli. Spominjao se njemački finansijer, udruženje, ostali su dužni određenim nevladinim organizacijama, pa i organizaciji postavio sam pitanje, pa evo i znamo zašto dolazi do utuživanja, upravo zbog toga što ... što Vlada nije ispoštovala svoj dio dogovora i nije finansijski podržavala ono što je obećala. Smatram da svakako tu treba naći najbolje moguće rješenje, ali su po meni tu najbitnija udruženja i djeca, ne znam koliko su do sad djeca koristila te dnevne centre koji su postojali u Visokom i Maglaju itd. Tu bazu podataka svakako da znaju i udruženja i ta saradnja između vlasti i udruženja će polučiti najboljim rezultatima. Nadam se da će se više uvažavati stav udruženja i nadam se da će ovaj objekat ili slični objekti ugledati svjetlo dan širom kantona. Hvala.

PREDSJEDAVAJUĆI

Pošto ste vi u svojoj diskusiji, na kojoj se zahvaljujem, predložili da prednost damo predstavnicima udruženja, da li poslanici ustupaju prednost predstavnicima udruženja, pa da onda nastavimo raspravu među poslanicima. Slažete li se? Neki klimaju, mislim, dajte molim vas, oni su sada u prilici da kažu, davali smo to i drugim udruženjima. Dakle, ja ovdje imam prijavljenje, gospodina Selvedina Dedića, predsjednika Udruženja „Dlan“ iz Zenice, izvolite. Samo molim goste da uvažavaju ovu moju napomenu da u najkraćem i najjezgrovitijem obliku saopšte svoje stavove prema ovoj Odluci. Izvolite.

SELVEDIN DEDIĆ, PREDSJEDNIK UDRUŽENJA „DLAN“ ZENICA

Ja vas selamim i pozdravljam. Zahvaljujem se na razumijevanju, na senzibilitetu prema ovim osobama. Gospodo, nismo mi ni protiv kojeg centra, ni protiv kojeg dobra što se odnosi za bilo koje, bilo koje, naglašavam, znači, osobe sa poteškoćama, ali, ljudi, moramo jedno razumijeti. Ja kao roditelj, al' ja govorim sad općenito, svaki roditelj, mora se uzeti u obzir, mora se saslušati jedan roditelj. Ja imam evo ovdje, znači, dokumenat, znači da ne ... ne idemo u konvencije, ne idemo ... Znači, dokument koji, države dokumenat, gdje samo u kratkom pasosu kaže citiram: „Prihvatiti organizacije osoba sa invaliditetom kao partnere, priznati im savjetodavnu ulogu prilikom pripremanja prijedloga zakona.“ Znači, mi ništa više ne tražimo, samo nas prihvatite kao partnere. Mi ... niko nas nije, znači, uz dužno poštovanje institucija, nije nas niko nazvao, rekao šta vi mislite. Imate li svoje mišljenje, nije. Mislim, meni je žao to reć'. Meni roditelji evo iz Olova, iz Zavidovića, iz Tešnja, iz ... niko nije obaviješten, niko nije upitan. Ja da nisam igrom slučaja na Facebook-u vidio ovoliki ovako tekst da se radi o tome, vjerujte da ja ne bih ni došao ovdje, jer ne znam. Radi mi se o glavi, a ne znam, onaj, ne znam. Nije mi niko pitao, informis'o, pozv'o. Pa, ljudi, ... Mi možemo najbolje reć' o čemu se radi. Roditelj koji ... evo imamo roditelje sa višom stručnom ili visokom stručnom spremom, ne može ni jedan roditelj raditi. Ne može! Ne može! Kod mene evo ne radimo ni ja ni supruga, ne možemo, dijete je 70 kg. Neće niko, ne može ga niko presvuć'. Ljudi, shvatite da su ovo bitne činjenice. Shvatite da sutra ćemo se zapitati i vi i mi svi šta smo uradili na ... na osnovu ovih populacija. Evo ja molim i „Humanost“, molim i Ministarstvo i premijera, mi zaista imamo fine odnose, mi evo znate da smo radili to igralište, imamo još projekata, trudimo se. Ljudi, ja nisam ovdje babaroga ni ovi ljudi gore iz udruženja. Mi smo ovdje da nađemo zajedni ... Prihvatite nas kao partnere. Haj' da sjednemo, da vidimo gdje su te tačke, bolne, gdje su te dodirne tačke gdje se zaista može napraviti kvalitetno nešto. Imamo problem, evo imali smo do sad, znači, problem hoćemo-nećemo. Hajmo napraviti javnu raspravu sa načelnicima, sa centrima za socijalni rad, sa Ministarstvo, s premijerom. Hajmo sjesti i nać' zajedničko nešto što će biti hajmo reć' našim jezikom svima drago, svima od koristi. Znači, to nam je cilj. Cilj nam je, evo ja pozivam i Ministarstvo i „Humanost“ da nam dadnu brojčano, da nam dadnu koliko će to biti djece u tom centru sa recimo 80% invaliditetom, sa težom mentalnom, sa lakšom mentalnom ... Znači, moramo imati ... Ne možemo samo reći mi ćemo tu djecu uzeti, mi ćemo se baviti njima. Znači, moramo imat o čemu će se raditi, da li neko dijete može to koristiti, ono dijete koje ne može koristiti. Hajmo naći satisfakciju, zamjenu da ako ne može doći u centar da mu dođe stručnjak kući, da ... da ... da ga evo kažem izmasira. Znači, znači, te moramo ... moramo te nijanse, znači, te moramo uskladiti, moramo da napravimo nešto da nam ne bude nakaradno. Imamo evo Dejton nam je nakaradan, šta imamo od njega, ništa.

PREDSJEDAVAJUĆI

Nemojte, molim vas, ulaziti u to.

SELVEDIN DEDIĆ, PREDSJEDNIK UDRUŽENJA „DLAN“ ZENICA

Neću, nego samo navodim kao primjer. Znači, hajmo napraviti nešto što je ... što je zaista kvalitetno, što će nam svima biti i vama, znači, i vama kao i nama drago, što će biti naše zajedničko čemu ćemo se divit, čemu će ... Kad dođete negdje na ... na, ne znam, u neke delegacije da s ponosom kažete mi imamo taj centar ili ... ili više centara, al' da s ponosom o tome pričamo, a ne da pričamo moje udruženje dobije 2.000,00 neko dobije 500,00, neko hiljada.

Hajmo malo senzibiliteta, ništa više, znači, uvažavanja ... Mi nismo, vjerujte, da nismo ni jednog momenta ni protiv kojeg udruženja, ni protiv Ministarstva, ni ... ni bilo koga. Znači, samo tražimo da se uvažavamo, ništa više. Hvala vam puno.

PREDSJEDAVALAČI

Hvala i hvala na dopisu koji ste mi uputili. Dakle, Udruženje roditelja djece i omladine s posebnim potrebama Tešanj, gospodin Miralem Mulabdić, predsjednik, izvolite. Zamolit ću i vas za jezgrovitost i konciznost, izvolite.

MIRALEM MULABDIĆ, PREDSJEDNIK UDRUŽENJA RODITELJA DJECE S POSEBNIM POTREBAMA TEŠANJ

Pozdrav svima. Ja neću dužiti. Samo ću se nadovezati na kolegu Dedića. Dolazim iz Tešnja, predstavljam roditelje i djecu i omladinu s posebnim potrebama. Iza mene u Tešnju stoji 350 roditelja. 350 roditelja nije upoznato ni sa Elaboratom ni sa ovom Odlukom. Nismo uvaženi ni javne ustanove centri za socijalni rad, isto tako, ni općine. Imali smo, evo vidite u Elaboratu, strana 24. Udruženje „Humanost“ je u 2012. godini 260.000,00 primila KM, Dnevni centar za djecu s posebnim potrebama pri JU Centar za socijalni rad kao nosilac aktivnosti, a naše udruženje partner je dobilo 2.000,00 KM. Imamo 30 djece, 4 radna dana, 6 sati borave, odlazimo od kuće do kuće sa svojim prevozom, punu uslugu, uslugu stručnjaka, 120 djece na čekanju koji ne možemo primiti, to nije realno. Pisali smo i Ministarstvu i samo smo dobili odgovor radite projekte. Radili smo projekat dječije nedjelje, odobren, čekamo već drugu godinu pare. Mislim da nije realno. Isto tako, molim vas, i ostale, znači, zastupnike da zajedno donesemo jedan stav. Ovdje se moraju pitati roditelji, javne ustanove kao lokalni nosioci brige o djeci s posebnim potrebama, naravno i općine. Općine su izdvajale 8.000,00 mjesečno, ja imam budžet Općine Tešanj, za rad pojedinog udruženja koji je dolazio u Tešanj jednom sedmično, radio sa 12 djece u trajanju od 3 sata. Mi radimo sa 30 djece, 4 radna dana. Mislim, ovi pokazatelji, ma to u Elaboratu sve navedeno što se toga tiče, samo tražimo da budemo uvaženi, pitani i naravno na našim skupštinama, skupštinama udruženja i roditelji da učestvuju u izradi ovog zaključka o osnivanju ovakvog centra. Neću dugo, eto toliko.

PREDSJEDAVALAČI

Hvala vam puno. Poslije vas, dakle, imam gospođu ili gospođicu Planinčić Sandru, roditelj djeteta s posebnim potrebama, zamjenik predsjednika Udruženja „Zvijezda“, izvolite. Ista molba ako je moguće.

SANDRA PLANINČIĆ, UDRUŽENJE „ZVIJEZDA“ ZENICA

Dobar dan. Ja vas sve pozdravljam. Evo ja ću biti jedna od rijetkih, čini mi se, koja će izraziti zahvalnost ministru Čuriću što je smogao hrabrosti i iznio ovo pred vas. Naime, od '97. godine, znači, ispravka je, nije od '99., kad su Norvežani osnovali prve dnevni centar pri ... u JU Specijalna škola, djeca sa ment ... teškom mentalnom retardacijom su uključena, je li, u socijalizaciju i rehabilitaciju. Sve dok su Norvežani bili tu kao glavni pokrovitelj svega toga, bilo je sve OK. Nažalost, kad su, ovaj, kad su raspodjeljenje uloge ministarstava, dolazilo je do problema, ovaj, koji dan-danas traju obzirom da smo mi vrlo često bili u kancelarijama kako kod ministra obrazovanja tako i kod ministra, ovaj, socijalne politike, tako da su oni vrlo upućeni s kakvim se mi problemima susrećemo. Mi roditelji kako iz JU bivša specijalna škola, tako i roditelji Udruženja „Zvijezda“, tako i roditelji „Budimo prijatelji“ koji su nastali iz „Svjetlosti“ se vrlo zdušno zalažemo s vašom idejom. Vi ovdje naime pričate da li je to 49.000,00 ili je miliona. To je već diskriminacija. Ova djeca su prepuštena roditeljima i napokon se rodila ideja da neko povede računa o toj djeca, da se napravi ... napravi javna ustanova gdje će sva djeca biti obuhvaćena, a mnogo djece ima koja sjede kod kuće jer u javnoj ustanovi koju trenutno imamo nema prostora ni kapaciteta. Znači, godinama imamo probleme zatvaranje djece, zatvaranja, nepristupačnosti, svega toga, dakle, kako gospodin iz Tešnja reće iza njega stoji 350, iza mene stoji i više od toga i mi se zdušno dajemo i dajemo sebe na raspolaganje ako možemo pomoći tom istom Ministarstvu da poboljša ovaj isti Elaborat, jer ima tu malo, ovaj, nečega s čim

se mi ne bi složili. Mi smo vam uvijek na raspolaganju uz svo dužno, ovaj, uvažavanje profesije i svim ovim ljudima koji su radili ovaj Elaborat. Ne podcjenjujem nikoga, ali niko na ovom svijetu ne može znati potrebe djeteta kao jedan roditelj i znači mi da sudjelujemo, da pomognemo da iz našeg iskustva sročite to šta je najbolje i, ovaj, za tu populaciju. Recimo ovdje mi se ovaj jedan dio ne dopada gdje kažete obzirom evo ako u javnoj ustanovi postoji 55 djece koja su, znač ... dakle, školuju, oni se ne školuju jer svi imaju rekategorizaciju da se ne mogu školovati niti po specijalnim uslovima. Oformljene su grupe, je li, po uzrastima i, ovaj, tu znači ima već 55 djece. U Udruženju „Budimo prijatelji“ je 20 djece. To je 70 ... 75 djece. Onda, vodeći računa da će se uključiti tu još neki, to će već biti cifra iznad 100-tinjak, je li, ovaj, šticeenika toga svega, pa mi ovako malo čudno kako ste samo rekli 2 defektologa da, ovaj, mogu obuhvatiti svu tu populaciju. Dakle, tu bi imali neke smjernice, jer mislimo da u svakoj grupi, a te grupe moraju biti manje da bi se moglo s djecom efektivno raditi. Znači, mi se zalažemo za to da u svakoj toj grupi mora biti i defektolog kao i asistent, da li će biti asistent ili, ovaj, edukator, rehabilitator nije bitno, ali, znači, moraju biti obe profesije. Drugo, imamo strašnih problema recimo kod prevoza te djece. Imali smo evo sad slučaj, znači, od '97. kad su Norvežani došli, pa ne znam da li ste se time možda bavili gospodine Ćuriću iz tog razloga to pričam, znači, kad je osnovan Dnevni centar u Zenici, obavezno je to je dakle bilo kao ortopedsko pomagalo prevoz te djece koja imaju višestruke smetnje, dakle, imaju motoričke smetnje, imaju kvadripareze, tetrapareze i koješta, koji ne mogu da hodaju i njima je prevoz od kuće do šk ... te ustanove vrlo neophodan. Tako da smo sad ... sve to znači od '97. do septembra ove godine, prošle godine teklo kako teče u cijeloj Federaciji. Znači, to je napisano pravilo svaka ustanova od Sarajeva pa na dalje imala je obezbijeden svoj kombi vlastiti koji su svi otprilike dobili kao donaciju i taj prevoz djece je tekao nesmetano. Međutim, dešava se udes, na sreću niko nije bio povrijeđen i tada mi saznajemo ustvari da nigdje u zakonu ne postoji definisan taj problem prevoza te djece. U septembru upućujemo Ministarstvu, nadležnom, da napravi izmjene zakona jer je toj djeci neophodan prevoz. Međutim, evo dobili smo odgovor da oni ne mogu, da je to tako zakonski, ali evo sad sam dobila neke smjernice gdje i kako se treba obratiti. Dakle, gospodine ministre, da i o tome povedete računa prilikom onog završnog Elaborata da je i to vrlo bitna stavka u svemu ovome. I još onda je ... nešto najbitnije, mi roditelji, evo ja govorim sada ispred roditelja te javne ustanove, jer smo imali stvarno dobru suradnju s gospodinom Ćurićem kad je bilo problema u septembru petero djece koja su navršila 21 godinu su bila izbačena iz te ustanove, jer zakon je tako nalagao. Ministar Ćurić nam je stvarno uvijek otvarao vrata i rekao da neće biti problema, da će njegovo Ministarstvo i dalje stajati tu i finansirati to što su finansirali. Malo smo imali problema sa Ministarstvom obrazovanja koje nas je onako rastezalo, pa kad je došlo do ključne tačke da, ovaj, obustavimo proces škole, tad smo dobili i njihovo aminovanje, dakle. Tako su djeca po nekom projektu, ta starija grupa, nastavila, dakle, samo za ovu godinu. Mišljenja smo da ...

PREDSJEDAVALJUĆI

Molit ću vas da privodite kraju.

SANDRA PLANINČIĆ, UDRUŽENJE „ZVIJEZDA“ ZENICA

... mišljenja sam, dakle, da svi ... sva nadležna ministarstva negdje moraju sudjelovati u svemu ovome. Dakle, ne može samo Ministarstvo socijalne politike finansirati jedan dnevni centar. Mislimo i tražimo da se tu i dalje uključe Ministarstvo za obrazovanje, dakako Ministarstvo zdravstva i ova, naravno, i opština. I onda kad bi se te 4, ne bi bio problem ni da se milion izdvaja. Eto toliko od mene. Hvala vam velika.

PREDSJEDAVALJUĆI

Kolega Kaze, možete li se još malo strpiti imam još dva predstavnika Udruženje „Humanost“. Hvala gospođi Planinčić. Udruženje „Humanost“, ovdje su najavljeni predsjedavajući Upravnog odbora gospodin Goran Bulajić i gospođa Đermanina Alispahić. Ko će? Menadžer Udruženja, izvolite. Pretpostavljam da je predsjedavajući Goran Bulajić, izvolite.

GORAN BULAJIĆ, UDRUŽENJE „HUMANOST“

Poštovane dame i gospodo, ja sam ustvari očiko... očekivao sasvim drugačiji tok ovdje, tako da sam da budem iskren, onaj, lično, malo, onaj, iznenađen da je Udruženje „Humanost“ stavljeno u neku poziciju ekskluziviteta ovdje u čitavom projektu. To uopšte nije tako. Ideja je nastala, znači, počev od mene i gospodina Georga Šila koji je vrlo dugo bio aktivan ovdje u kantonu i to je preraslo u jedan projekat koji smo mi vrlo zdušno i čitavo vrijeme vodili iz nekog osjećaja da mi to moramo uraditi, jer smo u mogućnosti da to učinimo. Svi donatori koji su poslije toga došli uključujući i njemačku vladu i Udruženje „Terra Tech“ su došli iz sektora koji je nivo rada sa osobama sa posebnim potrebama u Evropskoj uniji dig'o na nivo profitabilnosti. Znači, ljudi koji znaju kako treba raditi s tim osobama da se izvuče maksimum iz njih. Mi smo to pokušali pretočiti u praksu i kadar koji je dan-danas aktivan u svim centrima za ranu intervenciju, dnevnim centrima je proš'o te faze, edukacije i to će se nastaviti u budućnosti. Znači, Udruženje „Humanost“ stvaranjem ove ustanove je ... se neću reći povlači, nego nastavlja raditi na sasvim drugim stvarima, a to je da pomogne rad te ustanove, recimo na način da obezbijedimo vozila za prevoz djece ili neke druge stvari. Znači, sve nešto što kantonalna i javna ustanova ne može da čini, pogotovo prema fondovima Evropske unije. Znači, podrška ovom projektu je od prvog dana data od Ministarstva, nadležnog, kao i od ministra koji je u prošloj godini, znači, uspio stati na stranu udruženja koje je bilo u strašno velikim problemima. Ti problemi su se u početku ove godine pretvorili u nešto pozitivno, znači, da je Vrhovni sud Federacije rek'o da je to što se desilo udruženju nije ispravno i da poništava sve postojeće odluke. Međutim, čitav proces u 2013. godini je tek'o vrlo otežano i ljudi su svoj pos'o radili pošteno i profesionalno. Meni je sad zbilja žao što nismo imali priliku da pričamo sa ovim drugim udruženjima jer ja zbilja nisam stručno lice, ali u svakom slučaju ako postoji potreba da se dostave podaci ponaosob licima da to ne ide preko Ministarstva, znači, Udruženje stoji na raspolaganju. Znači, dokumenti su transparentni i samo vas molim da vodite računa da su u sve ove objekte koji su izgrađeni, znači, uložena sredstva njemačke vlade i stranih partnera. Znači, njima smo mi dužni odnosno Udruženje kao i kantonalna administracija da transparentno kažemo šta se dešava sa tim objektima i zgradama, u kojim vremenskim periodima oni mogu očekivati da se to pretvori u ustanovu. Znači, sljedeće sedmice su najavljeni posjeti ispred njemačke ambasade da se dadne ponovo podrška ispred njemačke vlade sredstava, a Udruženje „Humanost“ je trenutno, nažalost ili nasreću, je li, u poziciji da pregovara sa njima, što ne znači da ostala udruženja nemaju isto to pravo. Znači, mi apsolutno nemamo nikakav ekskluzivitet na ... na ... na te stvari prema stranim donatorima. Tako da ako postoje kakva dodatna pitanja, mi stojimo na raspolaganju.

PREDSJEDAVALJUĆI

Hvala gospodinu Bulajiću. Imam još predstavnicu, odnosno Udruženje roditelja djece sa poteškoćama u razvoju „Mala sirena“ Zavidovići, predsjednica Udruženja gospođa, mislim da je ovdje napisano, Mahovac Adisa, ne znam da li sam ispravno, vi korigujte.

ADISA MAHOVAC, UDRUŽENJE RODITELJA DJECE SA POTEŠKOĆAMA U RAZVOJU „MALA SIRENA“ ZAVIDOVIĆI

Dobar dan i selamalejk. Evo ja bih prvo da se predstavim. Ja sam Mahovac Adisa. Inače sam predsjednica Udruženja roditelja djece sa poteškoćama u razvoju „Mala sirena“. Majka sam jednog divnog dječaka koji takođe ima teškoće u razvoju. Ubrzo će mu ako Bog da 9 godina i po zanimanju sam profesor engleskog jezika i književnosti. Radim u jednoj osnovnoj školi već 13 godina. Zašto ovo govorim? Zato što želim da znate da sam jako dobro upoznata sa položajem djece s teškoćama u razvoju i sa aspekta roditelja i sa aspekta predsjednice jednog udruženja i naravno ono što je najvažnije, ustvari rekla sam, najvažnije roditelja, ali takođe i nastavnika koji zna kako ... u kakvom položaju su ta djeca. Ono što me najviše danas zaboljelo jeste jedna izjava koju sam imala na pauzi, hajde nije bitno ko mi je rekao, kaže „pa šta biste vi, vi ste udruženje, kome vi odgovarate“. Ja zaista osjećam potrebu da kažem kako je nastalo Udruženje „Mala sirena“. Prije osnivanja Udruženja, iskreno rečeno ja nisam znala ni kako funkcionise udruženje nit me zanimalo kako funkcionise jedno udruženje ni kako se osniva ni bilo šta u vezi toga. Ja sam svoje dijete vodila dvije godine u Centar u Zenici, Centar za rani podsticaj i zaista sam bila

zadovoljna. Međutim, bilo mi je koliko sam bila zadovoljna toliko mi je isto bilo jako teško da ga dovedim iz razloga što je to dijete, znači, bilo predškolskog uzrasta, hajde na stranu što sam ja poslije posla dolazila, međutim, dijete je toliko bilo izmoreno dok dođemo do Zenice, treba sat vremena najmanje, da dijete nije bilo ni za čeg', jel'. Jednom sedmično smo dolazili. To nije ni blizu dovoljno, naravno, za njegov napredak, ali ja se zaista zahvaljujem Centru „Humanost“. Znači, mi nismo tad imali drugog načina da pružimo svojoj djeci podršku. Pokušali smo ... kad je dijete krenulo u školu, više nisam mogla da ga dovedim ni u Centar. Nije bio ni za Centar u Maglaju, k'o što ne znam sad jeste li upoznati u Centar u Maglaju su uključena djeca koja bi trebala da pohađaju školu, ali zbog svog stanja ne mogu da pohađaju. Mi u školi imamo djece i sa autizmom i sa daunovim sindromom i sa cerebralnom paralizom, kombinovanim teškoćama. U odjeljenju mog sina ima troje djece, jedno je sa cerebralnom paralizom. Njegova majka je napustila posao koji je radila 12 godina da bi mogla biti, hajde da kažemo, asistent svom djetetu, mada nije to asistent, ne vodi se kao asistent, ali nije mogla drugačije svoje dijete da upiše u redovnu školu. Šta hoću da kažem? Hoću da kažem da smo mi morali osnovati udruženje jer smo se prvo obratile Ministarstvu obrazovanja, bila je ministrica Bernadeta koja nam je obećala da ćemo mi ... u telefonskom razgovoru sa ministricom zdravstva, obećale su nam da ćemo mi pri našem centru za mentalno zdravlje dobiti kompletan tim stručnjaka. Znači, baš sam pitala da li obećajete. Obećavamo. Međutim, naravno od toga nije bilo ništa. Iz više faktora. Ja ne krivim zaista ministricu Bernadetu, zaista je željela da pomogne, ali nije uspjela u tome. Dakle, kolega, gospodin, kako hoćete koji me je pitao, koji mi je tako rekao udruženje, mi nismo željeli da osnujemo udruženje, mi smo udruženje osnovali zato što smo morali. Evo ovako, ono što me je još jako zaboljelo danas jeste da niko nije spomenuo djecu iz Zavidovića. Ja dolazim u ime 78 djece i omladine, dakle, oko 160 i 170 roditelja. Govorim u ime njih svih. Nije ... možda 20% djece da je pohađalo ili individualne tretmane ili nebitno, znači, da li u Zenici ili u Maglaju iz više razloga. Jedan od razloga je da 80 ... od 78 porodica samo 57 roditelja je u radnom odnosu. 97 roditelja je nezaposleno. Prosječna primanja po članu su u 48 porodica su 116 maraka, a u 27 porodica ne radi ni jedan roditelj. Dakle, finansijski nisu u mogućnosti da dovode svoju djecu ni u Zenicu ni u Maglaj. Druga stvar, već sam spomenula, djeca ne mogu fizički da podnesu, ne samo fizički zbog svog stanja u kome se nalaze ni koncentracija, a treća stvar, djeca, kolega je to isto rekao kao pa šta hoćete kaže vaše dijete ide u redovnu školu. Ide u redovnu školu, hvala Bogu uz naš veliki trud jer smo mi ... mi roditelji se organizovali 4 mjeseca plaćamo, mi plaćamo asistente svoje djece, a i oni napreduju. 54 djece samo još ...

PREDSJEDAVALA

Molit ću vas da privodite kraju.

ADISA MAHOVAC, UDRUŽENJE RODITELJA DJECE SA POTEŠKOĆAMA U RAZVOJU „MALA SIRENA“ ZAVIDOVIĆI

Samo da još ovo kažem ... 54 djece ima svakodnevno, znači, individualne tretmane sa defektolozima, ostali su uključeni u radione i kućne posjete. Udruženje radi svaki radni dan, jednom mjesečno i subotom i ja zaista smatram da se ne može zanemariti ovoliki broj djece, da čak nije ni spomenut centar mada mi radimo i više nego centar samo što se ne vodimo kao centar. Eto ja bih zaista zamolila da se dobro razmisli. Nemamo mi ništa protiv „Humanosti“ zaista. Želimo da se razmisli o krajnjem korisniku, jer usluga se mora približiti djetetu. Oni imaju pravo na to i samo da završim, ono što je najbitnije, ja vam tvrdim odgovorno i kao nastavnik i kao roditelj i kao predsjednik Udruženja, djeca napreduju uz odgovarajući intenzivni tretman i podršku, nazaduju i postaju nesposobni za samostalan život bez te podrške. Hvala.

PREDSJEDAVALA

Hvala i vama. Evo ovako, znači, zahvaljujem se još jednom svim predstavnicima udruženja. Prema redosljedu nastavljamo raspravu, Zaim Imamović Kaze, javili ste se jedno 10 puta, dobit ćete jednom riječ. Nemojte samo prijateljstvo dovesti u pitanje.

ZAIM IMAMOVIĆ

Bilo mi je ... bilo mi je drago što sam saslušao ove roditelje i ja kao zastupnik, a mislim i svi zastupnici, u potpunosti podržavaju da Centar za djecu i odrasle zaživi u kantonu i želim da se zahvalim našim njemačkim prijateljima što su se uključili da pomognu ovim kategorijama i nadam se da će i dalje pomagati još i više. Ali ovdje imam ja jedan dobar prijedlog ovoj Skupštini i svim ljudima, predlažem da se uposle roditelji u ovaj centar jer oni imaju najviše iskustva sa djecom i oni će to najbolje raditi, da to ne bude stranačko zapošljavanje, koliko sam ja ovo vidio. Još moram da kažem samo ministru da je fino objasnio finansijsku konstrukciju ovdje, ali ipak ostajem kod toga da će to ipak koštati između milion do milion i po maraka, jer tu ima 40 novouposlenih i plus imamo onih 5 u upravnom odboru, nadzornom odboru, a mi znamo kako to tu ide, onda i reprezentacija i hodanje i ostalo. Ja toliko, hvala lijepo.

PREDSJEDAVALJUĆI

Hvala i vama kolega. Dakle, poslanik Bajrić, pa poslanik Iva Tadić. Jeste se vi javili? Ne. Ne. Vas sam registrovao, ali kolega Bajrić je sada po redosljedu, a i zastupnik Iva Tadić.

SAMIR BAJRIĆ

Ja još jedanput pozdravljam sve prisutne i uistinu mi je drago i kao čovjeku i kao zastupniku što smo na kraju usvojili ovaj zaključak i što smo ostavili mogućnost roditeljima da kroz javne rasprave kažu sve ono svoje i da utiču na ovu odluku u onom dijelu u kojem oni smatraju da trebaju. Ono što bih uistinu htio još ovdje spomenuti jeste sljedeće da smatram da ne trebamo žuriti ni sa vremenskim ograničenjima za javnu raspravu, da ne trebamo lomiti ove stvari preko koljena, jer smo vidjeli evo uz najbolju, ne umanjujući uistinu dobru namjeru Ministarstva i resornog ministra da se ova stvar napravi onako kako smatra ministar i Ministarstvo da je najbolje i da je najsvrsishodnije, međutim, smatram da 10 ili 15 dana koliko bi mi skratili ovu javnu raspravu u konačnici neće značiti ništa, a svaki dan koji ćemo ostaviti prostora roditeljima da uistinu kažu sve ove nedaće i sve ove probleme koje oni imaju u svakodnevnom životu će tim krajnjim korisnicima i onim zbog koga sva ova priča i krenula i sve ovo se pravi i da uistinu to ... tih par dana ništa neće značiti negativno, a njima će ostaviti puno više prostora da kažu sve svoje želje i svoje potrebe. I smatram evo kad dođemo do kraja rasprave i kad budemo razgovarali o vremenskom određenju koliko da traje ova javna rasprava, uistinu smatram da trebamo imati razumijevanja i da li će biti 30 dana jer hvala Bogu pa evo po Poslovniku i ne možemo manje, ali smatram ukoliko je to 40 dana da tih 10 dana neće ništa promijeniti a da ćemo ostaviti prostora za jednu kvalitetnu i dobru raspravu. Toliko.

PREDSJEDAVALJUĆI

Hvala. Izvinjavam se zastupniku Tadiću, premijer je htio da uzme riječ, pa vas molim ... premijer gospodin Munib Husejnagić.

MUNIB HUSEJNAGIĆ, PREMIJER KANTONA

Poštovani predsjedavajući, radno Predsjedništvo, uvaženi zastupnici, uvaženi gosti. Ja bih htio da kanališem malo ovu raspravu. Svašta sam čuo danas ovdje, ali bih htio podsjetiti na nešto. Ja stvarno cijenim roditelje koji imaju takvu ... dje ... djecu sa potrebama i imam u komšiluku, imam i prijatelja i to su heroji. Heroji! Veliki heroji i ja što se mene lično tiče i budžeta bih pokušao maksimalno izdvojiti sredstva za te namjene i da tu pokušamo u najvećoj mogućoj mjeri potrebe zadovoljiti, ali mislim da se nismo razumijeli danas uopšte. Mi danas ne raspravljamo o potrebama, o nivou sredstava za ove namjene. Ovo nije danas javna rasprava kol'ko će budžeti izdvojiti za ove namjene i kako. Gospodo, mi danas raspravljamo o osnivanju javne ustanove kao embriona i rješavanje jednog problema koji je nastao na bazi povlačenja „Humanosti“ i ove međunarodne zajednice iz ovih projekata. Mi, znači, može krenuti rasprava i u drugom smjeru. Možemo reći da zatvorimo te centre i da vidimo ovo što imamo na raspolaganju, podsjećam ministar mi je rekao, znači, 600.000,00 maraka u budžetu ima planirano ove godine za ove namjene. Znači, 600.000,00 maraka ima i to nam je na raspolaganju. Mi ne možemo raspravljati o osnivanju novih centara, ne možemo raspravljati o uvođenju novih prava itd. To je za

održavanje ovog nivoa koji je prezentiran. Mi možemo raspravljati o budućnosti i davati zadatke tom prijedlogu za osnivanje ovog centra koji će dalje širiti na određene sredine. Znači, ne govorimo o milionima, jer ih nema, nit će se popuniti sistematizacija od 40 i nešto ljudi kol'ko ste pričali ovdje, govorimo o pokriću za onih kol'ko imamo u budžetu 400.000,00 planiranih. Podsjećam da je ove godine u odnosu na lanjski budžet blizu 5 miliona povećan budžet socijalna davanja. Blizu 5 milina. Nema još miliona. Nema mogućnosti. Rado bih dao, rekao sam kako ja osjećam direktno prema tim roditeljima i toj djeci. Moram priznati da sam u Zenici posjetio Centar i pri ... i posjetio sam u Maglaju, to su predivni centri i objekat uslovan i ljudi koji rade sa njima i sadržaji i programske aktivnosti koje stručnjaci obavljaju sa tom djecom i da ih je bogdo u svakoj općini i da pokrijemo svu tu djecu. U ovom momentu je na raspolaganju za ovu godinu 600.000,00. Imamo pokušaj osnivanja centra kantonalnog kao embriona da spasimo ova tri centra i da se kao koncentričnim krugovima širimo i prema potrebama prema ostalim. Znači, imamo mogućnost da prema ... zatvorimo ove centre i da nekom drugom preraspodjelom ako ima zahtjeva iz drugih sredina, drugom nekom preraspodjelom dodajemo udruženjima itd. i potrebama građana i koji imaju ovakvu djecu. Znači, ja bih samo molio, znači, raspravu vodimo o osnivanju kantonalnog centra za ove potrebe sa ... sa embriono sa ova tri, a ne govorimo o potrebnim sredstvima i načinom zaštite i pomoći djeci i porodicama koji imaju djecu s posebnim potrebama. Evo samo toliko. Hvala.

PREDSJEDAVAJUĆI

Hvala premijeru. Zastupniče Tadić, izvolite.

IVO TADIĆ

Gospodine predsjedavajući, članovi Vlade, kolege zastupnici, gosti, mediji, na poseban način pozdravljam vas predstavnike ovoga centra za djecu i odrasle sa posebnim potrebama. Ja ću samo nekoliko riječi vezano za ... za ovu točku dnevnog reda. Ja sam i dalje mišljenja i stava sam da smo trebali donijeti danas odluku, da nismo imali potrebe ići u formi nacarta i do sad iz svih izlaganja nisam čuo ni jednu, ni jedan ... ni jednu primjedbu koja je ... zbog koje bi trebali ovo odgoditi u formu nacarta. Od prilike sve je to na ovom fonu što je već Ministarstvo predložilo. Mislim da je ministar dobro pojasnio kad je u pitanju i finansiranje i sve drugo. Žao mi je i ne bih volio da ... da roditelji i vi predstavnici ovih centara dobijete pogrešan dojam kad je u pitanju ovo. Nažalost, mi svaki puta i ovdje evo kad je i ovo tema unesemo prilično politike u sve ovo. Međutim, moramo biti iskreni kad je u pitanju ova populacija. Ne vidim ja da je Vlada il' bilo tko htio nešto napraviti preko koljena. Možda su i napravili propust, možda se nisu dovoljno konsultirali sa vama predstavnicima, ali ne vidim razloga i evo sada nek' se ... nek' se ostvari ... nek' se ostvari nova koordinacija, al' kad je u pitanju ova populacija ja vam tvrdim evo i premijer je sam rek'o, svako od nas da li u članovima obitelji, užim, širim, da li unutar susjedstva srećemo takve ljude, nažalost, sa posebnim potrebama i svi toliko suosjećamo. Tako isto i ova Vlada i ova Skupština i mi kao društvo moramo zapravo ... Nije, ja se ne slažem s ovim koji iznose da li će ovo biti 40, 50 ili milion maraka. Kad je u pitanju ova populacija, moramo, moramo im osigurati što bolje uvjete i ne smije biti ključno pitanje koliko je to sredstava. Ja mislim da je ovo dobar način da se riješi i sa jednog mjesta ... Možda će neki izgubiti malo i samostalnost, oblik nekakve autonomije ili nešto, formiranjem ovog centra, ali to jednostavno mora funkcionirati na ovakav način zbog koordinacije sa međunarodnom zajednicom, sa sredstvima koja dolaze i sredstvima koja ... koja Vlada daje unutar ove ustanove. Evo još jednom, ja zahvaljujem i kažem volio sam da je išlo u formi prijedloga, međutim, evo, želim vjerovati da će pogotovo Ministarstvo sad u narednih nekoliko dana koliko bude javna rasprava više obaviti razgovora sa vama predstavnicima ovih ustanova. Hvala.

PREDSJEDAVAJUĆI

Hvala kolegi Tadiću. Zastupnice Emina Huseinspahić, izvolite.

EMINA HUSEINPAHIĆ

Obzirom da se prvi put javljam, ja želim da poselamim i pozdravim sve prisutne. Ovaj, danas moram reći da nastupam, evo, neću reći da se ugledam na svog kolegu Hasana, ali zaista, pod jakim emocijama nakon izlaganja, posebno nakon izlaganja predstavnika udruženja djece i odraslih sa posebnim potrebama, obzirom evo da sam i ja na neki način ono kako nas vole zvati neke posebne, specifične kategorije, a ja eto ne volim baš da nas tako zovu. Što se tiče ove tačke dnevnog reda, ja bih se osvrnula na izlaganje premijera koji je rekao, izašao ustvari s potrebom da kanališe diskusiju koja se vodila ovdje u smislu da se ne razmatra ekonomski segment i ekonom ... ekonomski aspekt ovog projekta, cjelokupnog. Ja bih rekla da apsolutno nije bilo potrebe za tim obzirom da je tačka dnevnog reda formulisana na način da se radi o Prijedlogu Odluke o osnivanju JU Centar za djecu i odrasle osobe sa posebnim potrebama Ze-do kantona sa Elaboratom o društveno-ekonomskoj opravdanosti itd. Dakle, ljudi su s pravom postavljali pitanja i upustili se u raspravu i o ovom ekonomskom segmentu. Što se tiče same inicijative, samog ... same Odluke, ja sam prezadovoljna. Naravno, predsjednik Kluba SBB-a u Skupštini Ze-do kantona već je iznio naš stav i sretna sam osebice nakon izlaganja predstavnika udruženja djece i odraslih sa posebnim potrebama da smo ovu Odluku vratili u nacrt, jer će se provesti po općinama javne rasprave gdje će i ovi predstavnici i roditelji koji najbolje znaju kako deveraju, ovaj, sa svim tim š ... teškoćama, uključiti se maksimalno sa konkretnim prijedlozima. Ovdje ih nismo čuli, ali ovo danas i nije mjesto za te prijedloge nego, ovaj, to je javna rasprava u koju ćemo se, svakako, i mi svi uključiti. I još jedno pitanje priređivačima, ovaj, Elaborata, ja se neću baviti ciframa, ovaj, ali ću se baviti sistematizacijom koja je izložena, ovaj, u ovom Elaboratu gdje meni posebnu pažnju prid ... privuklo, ovaj, potrebno radno iskustvo. Dakle, vi ćete vidjeti i ukoliko ste već izvršili uvod ... uvid da se samo za direktora i koordinatora organizacionih jedinica traži iskustvo od 3 godine. Sve ostalo, uključujući i zdravstveno osoblje, defektologe i ostale, fizioterapeute, radno iskustvo je jedna i pola godine, potrebno radno iskustvo. Ja zaista cijenim da je afirmativno ovo da se ta granica smanjila, jer se omogućava, kamo sreće da je to u zak ... i u ostalim zakonima i odlukama, pa da se tako može zapošljavati i u upravi, itd. Međutim, cijeneći da se radi o djeci i odraslima sa posebnim potrebama, ja smatram posebice kad su u pitanju zdravstveni radnici da to trebaju biti ljudi sa velikim iskustvom i radnim i, ovaj, kompetencijama, dakle, da daju maksimum, ovaj, u svom radu sa tim licima. Uz svo uvažavanje, godine i iskustva, to je obavljen pripravnički staž, ipak tu treba još dosta i iskustva i rada, posebice rada sa ovim kategorijama, ovaj, da bi se mogao očekivati rezultat, dakle, koji roditelji očekuju od ovakvih ustanova i centara. Zato bih molila priređivača da mi, znači, evo, odgovori ili pojasni zašto je ovaj dio radnog iskustva sveden da bukvalno kažem simplificiran na minimum minimuma. Eto, zahvaljujem se.

PREDSJEDAVALJUĆI

Hvala zastupnici Huseinspahić. Poslanik Plančić.

IBRAHIM PLANČIĆ

Evo koristim priliku i ja ponovo da vas sve pozdravim. Naravno, evo i meni je takođe drago što je ovaj dokument pretvoren u nacrt i dakle imat ćemo priliku da ... da svi po lokalnim zajednicama izvrše uvid u ovu Odluku i više se ne bih osvrtao na to. Naravno, podržavam sve one diskusije koje su govorile u prilog toga i razumijevanja, dakle, prije svega porodica u kojima su ova djeca, dakle, i oni problema s kojima se one susreću. Ja ću se konkretno sada osvrnuti, dakle, na Prijedlog ove Odluke. Mi nismo kao Klub ulagali amandmane jer smo otprilike pretpostavljali da ... da će preovladati razum i da ćemo ovo uputiti u javnu raspravu, dakle, i što bi ... je bila suštinska primjedba, dakle, i pošto je to napravljeno, a sad je otvorena faza već javne rasprave, dakle, od ove Skupštine. Ja ću se osvrnuti na pojedine članove predložene Odluke i predložiti ću da u članu 5. stav 4. Odluku o osnivanju koji glasi, dakle: „Odluku o osnivanju poslovnih jedinica Centra donosi Upravni odbor Centra uz saglasnost Vlade Zeničko-dobojskog kantona“ ovdje stavimo tačku, da se briše ovo „i Udruženje „Humanost- Societas Humanitas“ Zenica“ Dakle, cijenim napore ovog udruženje, ali smatram da Vlada prethodno treba da ... da ... da ima ovu saglasnost ove organizacije, a da mi donošenjem skupštinske odluke ovdje obavezu

prenosimo da ... da samo Vlada da tu saglasnost i da se formiraju ovi centri. Dakle, smatram da ovo udruženje ne treba da stoji u sastavu ove odluke. To je moj prijedlog naravno za javnu raspravu. Sljedeće ... sljedeća moja primjedba odnosi se na član 13. stav 3. a tiče se organa upravljanja odnosno centr ... odnosno u sastavu Upravnog odbora. Dakle, pod 3. ... stav 3. glasi: „predsjednika i članove Upravnog odbora imenuje Vlada Zeničko-dobojskog kantona, (u daljem tekstu: Vlada), na period od 4 godine i mogu biti ponovo imenovani.“ Ja smatram da ovdje treba uvesti vremensko ograničenje, kao što smo radili u svim javnim ustanovama. Dakle, da maksimalno mogu biti 2 mandata imenovani članovi Upravnog odbora. Na isti način i u članu broj 6 ... 16. stav 3. „direktora Centra imenuje Upravni odbor na osnovu javnog konkursa uz saglasnost Vlade na period od 4 godine i može biti ponovo imenovan.“ To znači, možemo imati doživotnog direktora. Ja smatram da treba ograničiti broj na dva uzastopna mandata kao što smo uradili u svim javnim ustanovama. Zahvaljujem.

PREDSJEDAVALJUĆI

Hvala. Kolega Šišić, izvolite.

IBRAHIM ŠIŠIĆ

... kratak. Ja vas sve selamim i pozdravljam. Želim zaista samo poslati jasnu poruku osobama sa posebnim, da tako kažem, potrebama. Ni jedan zastupnik nije bio protiv ove Odluke i to je po meni veoma važno. Ono što smo željeli poslati poruku, a to je da ovakve odluke su sistemskog karaktera. Ovakve odluke imaju dugotrajne posljedice i ovakve odluke moraju imati danas i svoj početak i svoj kraj. Šta to znači? Mi donosimo ovakvu odluku, a tamo je lijepo u leob ... Elaboratu rečeno u kome se stavljaju u jedinstveni sistem. Po meni nije jedinstveni sistem sublemirati ono postojeće, jer će se javljati potrebe i sljedeće a koje mi ovdje ne vidimo. Tamo se kaže da imate multidisciplinarni i multisektorski rad. Uredu, ali ovdje upravo u startu vidimo više subjekata. Udruženja su danas fenomenalno kazala, ja mislim da, ministre, ovo je danas i privilegija i da smo imali pravo i čuti ova udruženja i da imamo pravo vjerovati da danas donosimo bolju ... bolju odluku. Ako su u ovom procesu uključena udruženj ... odnosno osobe, udruženja, opština i Vladu odnosno opštine, onda ja zaista vidim opravdanja zašto mi donosimo ovu Odluku u formi ... u formi ... u formi nacrtu. I na kraju, veoma je važno, želim da se prav ... pravilno razumijemo, sve nešto, ima ona narodna, kaže: „Na početku njive se dogovara posao“, moramo znati koliko ovo košta, o uvjetima, ekonomisti to vrlo dobro znaju, o uvjetima finansijske restrikcije i uvjetima kad moramo uravnotežiti prihod i rashod. Ja hoću s te strane da ponesem odgovornost i da jednostavno i još jednom sa ovim argumentom kažem da budući nacrt sa raspravom treba ponuditi zastupnicima i ovu kariku, jer ćemo onda znati koje je pravo svakog korisnika ili da li je ono načeto ili je ono full pravo. Mislim da je to ono što sam imao potrebu da kažem. Hvala vam lijepo.

PREDSJEDAVALJUĆI

Hvala poslaniku Šišiću. Kolega Karavdić, izvolite.

SENAD KARAVDIĆ

Evo otprilike slična diskusija kao i prethodne. Dakle, glasali smo za formu nacrtu i mislim da nismo pogriješili. Nakon izlaganja predstavnika udruženja vidjeli smo da stvarno postoji potreba da se ovo malo šire sagleda i da se uključe, znači, i predstavnici udruženja i roditelji individualno kroz javne rasprave. Znači, oni koji nisu obuhvaćeni udruženjima itd. I mislim da je vrlo važno uključiti i, ovaj, izvršne vlasti svih lokalnih zajednica ili čak i općinska vijeća. Eto postoji mogućnost kroz javnu raspravu da se oni uključe, ali moj prijedlog bi bio da se ... da Ministarstvo napravi jedan radni sastanak, možda sa načelnicima općina svih, znači, sa područja kantona, bez obzira da li na svom ... svom teritoriju imaju centar ili nemaju i bez obzira da li uopšte sa svoje općine šalju djecu u određene centre. Mi svi znamo da sigurno postoji veliki broj djece koji imaju potrebu za ovakvim vidom pružanja zaštite i usluge kroz dnevni centar, ali osim toga što mi pomažemo djeci na taj način vrlo važna, znači, jedna stavka druga je i pomaganje roditeljima. Vidjeli smo iz izlaganja gospodina Dedića, mislim da se zove, jel', prvi ovaj

govornik koji je bio iz udruženja, da postoje roditelji, znači, odnosno većina roditelja se odriče svoje profesionalne orijentacije, nemaju vremena da rade ono za šta su oni, ovaj, iškolovali i osposobili samo da bi mogli pružiti adekvatnu njegu i zaštitu svojoj djeci. Dakle, dvostruka je korist u svakom slučaju tih dnevnih centara. Na izvjestan način ćemo rasteretiti roditelje da oni naprave jedan mali predah u svom životu, jer su strašno, ovaj, ti ljudi izloženi ogromnim naporima, kako umnim, fizičkim, tako i finansijskim i mislim da je ovo sa dnevnim centrima odlično zamišljeno. Mislim da ustvari svaki grad na području općine ima potrebu za dnevnim centrom. Evo recimo u Visokom dnevni centar ima kapacitet 60 ... 60 djece. Trenutno, odnosno, do sad je tu uslugu koristilo vrlo malo, mali broj djece, 16, ali mislim da je to bilo više nego su ljudi dolazili, pa su odustajali, nisu imali uslova da dođu, nisu mogli obezbijediti prevoz, nisu imali novca za prevoz, itd. Ali svi koji su došli, ja znam, bili su oduševljeni. Bili su oduševljeni uslugom. Bili su oduševljeni idejom da ... data djeca borave zajedno, da im se pruži stručna pomoć, itd. Tako da mislim da, ovaj, nastojanja Ministarstva da ovo institucionalno uveže ovu oblast kroz ... kroz formu ove javne ustanove su zaista za pohvalu. Mi smo i na komisiji se izrazili u tom smislu da podržavamo to, pozdravljamo, ali smo isto tako tamo stavili jednu opasku, znači, da posao nije potpuno završen, da odnosno ova Odluka nije u cjelosti definisana, ne obuhvata sve segmente, znači, koji su potrebni da se uvede jedna sigurnost u regulisanje ove oblasti. Prije svega mislim na finansijsku, jer evo ja ću samo reći da je objekat u Visokom koji je eto zadnji napravljen, znači, koji je najmoderniji sigurno, koji je radio godinu dana i nakon nepunih godinu dana je bio prisiljen da ... da ... da prekine sa radom, da se zatvori iz nedostatka finansijskih sredstava i problema sa ... sa finansijama. Dakle, da se to ne bi desilo, bolje što smo ovo odgodili za mjesec-dva, a da izdefinišemo, znači, potpuno način finansiranja, jer mislim da bi bilo sramota da sad i nakon formiranja ove kantonalne ustanove, da tako kažemo, za mjesec, dva ili tri ili pet dođemo u situaciju da oni ne mogu funkcionisati. Dakle, mislim da ... vidjeli smo kod izlaganja predstavnika udruženja, oni svakako imaju svoje mjesto u svemu ovome i da ih treba posmatrati kao partnere. Mislim da će oni moći kroz, ovaj, traženje donacija sigurno će ih imati, ovaj, obzirom na njihovu aktivnost i na raspoloženje u zapadnoevropskim zemljama gdje ... gdje je ova oblast zaista dobro uređena, da će sigurno moći dosta doprijeti u obogaćivanju centra, kako opremom tako možda i nekim posjetama stručnih sa ... sa ... iz nekih drugih zemalja. A vrlo važan segment kao što je navedeno u Elaboratu tamo što je napisano da uz organizaciju prevoza, znači, može se pružiti usluga, znači, svim općinama na kantonu. Dakle, lijepo je to rečeno za organizaciju prevoza, ali nije definisano. Znači, ta organizacija ne može biti svedena na usput da komšija poveze to dijete itd. njima potrebna je, nekima i posebna vozila sa ... niskopodna vozila, kombiji sa platformama pokretnim, itd., možda sa ulaskom kolica i to. Tako da mislim da je s te strane ostavljena mogućnost da se kroz donacije koji bi udruženja tražila i koje bi dobili prije nego što bi ih dobila sigurno, ovaj, kantonalna ustanova, jer su nevladini sektori, odmah imate drugačiji odnos prema njima, nego prema, jel', ovim političkim da tako kažemo tijelima i, ovaj, ustanovama kantona. Tako da mislim da ova rasprava mora definisati i to. Vrlo važan segment je član 9. tačka 2. u kome se kaže da se ustanova finansira, znači, iz budžeta kantona i iz sredstava općina u dijelu ili u cijelom iznosu. To se mora definisati i iz drugih izvora, tako glasi ta tačka 2. Dakle, ono što je važno u lokalnim zajednicama je da se tačno izdefiniše koliko ko učestvuje u finansiranju tih ustanova. Po mom mišljenju, mislim da bi trebalo ako ćemo opterećivati općine mimo, znači, kantonalnog budžeta, jer oni su već jednom uložili novac u kantonalni budžet. On dolazi iz općina, je li tako i dolazi sa većeg nivoa. Naravno, očekujem sa federalnog nivoa sigurno dio sredstava koji će biti usmjeren za rad ovog centra. Onda bi, po mom mišljenju, trebalo ići po principu solidarnosti, da sve općine podjednako snose, ovaj, doprinos za rad ovog centra, jer ja vam garantujem da u svakoj općini bez obzira da li sad neko koristi tu uslugu ili ne, postoje djeca koja imaju potrebu za ovom uslugom. Eto ja bih samo tako znači konkretno da se obrati pažnja na finansiranje, na ... na ... na sudjelovanje općina i da se ovaj nevladine organizacije, dakle, ne nađu tu u nekom smislu, neko je ovdje baš rekao, mislim da je Iva Tadić rekao da će možda neko se osjetiti sad tu zapostavljenim ili ... ili ... ili čak možda da ne treba. Ne! Naprotiv, mislim da će organizacije biti rasterećene ovog stručnog dijela, jer koliko sam vidio sad čini mi se da i organizacija „Humanost“ imala problem sa blokiranjem ...

PREDSJEDAVAJUĆI

Molim vas, privodite kraju.

SENAD KARAVDIĆ

Evo odmah ću. ... sa blokiranjem računa zato što su angažovali neku stručnu osobu po ugovoru o radu, a sad ćemo imati instituciju, znači, imat ćemo centre gdje ćemo fala Bogu sigurno zaposliti stručne osobe koje nećemo imati potrebu, znači, kroz udruženja angažovati stručnjake, da se udruženja više baziraju na jednom volonterskom radu i na prikupljanju nekih donacija. Hvala.

PREDSJEDAVAJUĆI

Hvala i vama. Koleginica Mundžić, izvolite, pa koleginica Ugarak. Dvije dame.

INDIRA MUNDŽIĆ

Ja mislim da niko od nas ovdje prisutnih ne osjeća simpatiju i ne osjeća suosjećanje posebno, poseban pietet sa ... za djecu sa posebnim potrebama, a naročito za roditelje koji imaju djecu sa posebnim potrebama. Svi smo to se složili. Takođe, složili smo se da je neosporno i neo ... da je neosporno i da je stvarno opravdano formiranje ovakvog jednog centra, a eto složili smo se danas da to ipak treba da prođe i određenu javnu raspravu. Međutim, ja želim samo da dam određena pojašnjenja, a cijenjeni ministar je tu da me ispravi, da li sam ja pogrešno razumijela evo bilo je dosta primjedbi, pritužbi na ovaj Elaborat. Vjerovatno da se on treba i, ovaj, doraditi. Dakle, neosporna je opravdanost formiranja ovakvog centra zbog ujedinjena evo trenutno 3 postojeća dnevna centra na području Zeničko-dobojskog kantona. Ja kol'ko sam razumijela nisu potrebna dodatna finansijska sredstva, nego će se finansiranje vršiti na osnovu već planiranih, opredjeljenih sredstava iz budžeta Zeničko-dobojskog kantona preko resornog Ministarstva za rad, socijalnu skrb i izbjeglice. U Elaboratu je navedeno da je u 2012. godini, cijenjeni zastupnici pratite me, Škola za odgoj Zenica finansirana u iznosu od 92.040,00 KM, Dnevni centar Maglaj 106.353,00 KM, Centar Zenica za predškolsku djecu 158.000,00 KM, Dnevni centar Zenica 18.000,00, Dnevni centar Tešanj 2.000,00, Dnevni centar Visoko 180.000,00. Plus 2.457.919,00 KM koliko Ministarstvo za rad, socijalnu skrb i izbjeglice izdvaja za smještaj i obrazovanje ovih kategorija izvan Zeničko-dobojskog kantona. Moram reći da su to pozamašna sredstva. Šta hoću da kažem? Razumijela sam da se neće ... da neće biti potrebno izdvajanje nikakvih dodatnih sredstava nego da su to već planirana sredstva koja će biti namjenjena za finansiranje ove djelatnosti. Htjela bih da kažem, isto razumijela sam, da postoji mogućnost da se na ovaj način smanji što mi kažemo iz oblasti zdravstva vankantonalno liječenje, ovdje vankantonalni institucionalni smještaj i obrazovanje za koje se troše velika sredstva iz budžeta kantona. Znači, formiranjem ove institucije da će se na taj način uvesti reda i da će se na taj način, ovaj, omogućiti manji odlazak i manji odliv sredstava van područja Zeničko-dobojskog kantona. Možda nisam upravu.

PREDSJEDAVAJUĆI

Zamoliti ću cijenjene koleginice i kolege da se malo

INDIRA MUNDŽIĆ

Evo završavam, pri kraju sam.

PREDSJEDAVAJUĆI

Ne, ne, ne upozoravam ja vas, nego radi koncentracije.

INDIRA MUNDŽIĆ

Znam, radi koncentracije.

PREDSJEDAVAJUĆI

Ma ja, izvinite.

INDIRA MUNDŽIĆ

Smatram da postojeća udruženja koja vrlo dobro rade, u kontaktu sam sa svim udruženjima, u kontaktu sam i sa određenim roditeljima koji mi svakodnevno dolaze i traže određena prava za svoju djecu, što se tiče i liječenja i ortopedskih pomagala i lijekova. Smatram da ova udruženja treba da budu potpora Ministarstvu za rad, socijalnu skrb, izbjeglice, a isto tako i Ministarstvo za rad, socijalnu skrb, izbjeglice treba da bude potpora tim udruženjima. Zbog toga smatram opravdanim da se dogovorite nakon ove rasprave direktno i da poboljšate ... poboljšate ovaj Elaborat, a da će svakako uslijediti opravdano formiranje ovog predloženog kantonalnog centra za osobe sa posebnim potrebama na području Zeničko-dobojskog kantona. Toliko. Hvala.

PREDSJEDAVALJUĆI

Hvala zastupnici Mundžić. Koleginica Ugarak Meldina, izvolite i sa ovim molim da zaključimo ovu tačku dnevnog reda i da pređemo na izjašnjavanje, izvolite.

MELDINA UGARAK

Uzimajući u obzir da nam je koncentracija poprilično svima opala, ja ću probati da u što kraćim crtama obrazložim svoj stav. Ovako, žalosti me činjenica, a mislim da će se složiti većina da je Ministarstvo za rad, socijalnu politiku i izbjeglice uvijek bilo Ministarstvo koje je vršilo uštedu na svojim rashodima. Nažalost, to neko shvata pozitivno. Ja mislim da je to žalosno kad smo u toj situaciji da moramo to raditi. Pošto sam osoba od terenskog prikupljanja informacija, ja sam direktno uključena u pojedina udruženja jer sam sama sebi dala zadatak da obiđem pojedina i da vidim sa kojim problemima se ta udruženja suočavaju. Neću reći koja su to udruženja da ne bi bilo zloupotreba govornice ili da se neko politikanstvo vodi ovdje, iz tog razloga neću navesti. Želim da kažem da većina udruženja ima problema sa osobljem koje radi, jer ima ih malo. Nema dovoljno osoblja koja obavljaju te dužnosti. Išli smo sa prijedlogom da se uvede volontiranje i to ne mogu prihvatiti, jer zakonski nisu omogućeni. Mislim da bi bilo dobro u narednom periodu da bi se umanjili problemi ovakvih udruženja da se omogući mladim osobama koja su na birou za zapošljavanje da im se omogući volonterski rad. Mislim čak i većina njih da bi pristala i na besplatan svoj doprinos, ne mora u punoj satnici, ali mislim, krenem od sebe pa od drugih ljudi, da bi svako mog'o odvojiti u sedmici dana, ko ne radi, dan do dva dana da se žrtvuje i da svoj doprinos u tim istim udruženjima. Prevoz, gospođica, mislim da je Planinčić gospođa već spomenula, ja sam takođe upoznata u vezi ove problematike i prikupila sam dovoljno informacija da bi se moglo raditi, da se riješi ovaj problem kroz zakonsku regulativu. I ovom prilikom želim da uputim inicijativu resornom Ministarstvu da u mogućnosti svojim, znači finansijskim mogućnostima da obezbijedi udruženjima prevozno sredstvo, onim udruženjima koja nisu u mogućnosti da sama sebi obezbijede to. Naravno, ono ... one prevoze koji su sukladno sa potrebama te djece sa posebnim potrebama. Svakako neću dalje da dužim, ali želim da ... jedva čekam da javna rasprava bude i ja se nadam da će te javne rasprave biti adekvat ... da ćemo biti adekvatno informisani kada se budu održavale po opštinama i kada budu održavane u kantonu, jer definitivno mislim da možemo direktno i konkretno predlagati alternativna rješenja svi mi pojedinačno. Tako ... Eto toliko, hvala.

PREDSJEDAVALJUĆI

Hvala. Predlažem da zaključimo ... Izvolite ministre, mislio sam da ćete vi iskoristiti priliku sljedeći put kad se prijedlog formuliše. Izvolite. Ministar Ivica Ćurić.

IVICA ĆURIĆ, MINISTAR MINISTARSTVA ZA RAD, SOCIJALNU POLITIKU I IZBJEGLICE

Hvala predsjedavajući. Otišli smo danas, evo vidimo već i na dugo i na široko. Ja se nadam kroz ovu raspravu koja će uslijediti naredna da to neće se dogoditi. Meni je žao što ovakve teme moraju biti ispolitizirane, što se na ovakvim temama ipak mora politika uvlačiti, ipak neke političk ... političke priče pričat' što nema smisla i što nije korektno prema populaciji o kojoj govorimo i prema ... i zbog interesa populacije zbog koje ovo sve i radimo i predlažemo. Meni je drago što smo ... i meni je sad na kraju drago što smo, ovaj, ovo pretvorili u nacrt i da smo čuli

ljude koji ... koji imaju potrebe, koji su koji su direktno uključeni u sve ovo i da vid ... i da se vidi da je Ministarstvo i sa svojim prijedlogom da radi ovo sve u interesu toga da se tim ljudima to sve olakša, taj život, da se olakša funkcioniranje dnevnih centara. Ovo što smo čuli danas ništa niste čuli novo osim što je predloženo. Ništa novo nismo čuli i ne vjerujem da ćemo čuti išta novo i u javnoj raspravi, ali evo. Drago mi je da smo čuli danas i ljude koji ... koji su željeli da kažu i s pravom su rekli ... i s pravom su rekli sve što su rekli, ovaj, i mi ovo sve upravo i činimo da bi olakšali udruženjima rad, da bi ... da bi dnevni centri funkcionirali, ali na institucionalan način u okviru zakona, u okviru regulative koja je nama obaveza po Ustavu i po zakonima koji ... Ze-do kantona. Ove ... ovi jav ... ovi dnevni centri već imaju ova vozila o kojim priča se, ali nema ih dovoljno. Nema ih dovoljno, ali su već naru ... Mi smo već kao Ministarstvo sa partnerima ovim s kojima smo do sad to radili za ... započeli ... pokrenuli inicijative da se poveća tih broj vozila kroz donatorske aktivnosti koji ... ovog Udruženja „Humanost“ koji jeste. Ovo čuli smo tamo, spominje se, ovaj, broj defektologa i ne znam ni ja, ove sistematizacije, ove ... Znači, sistematizacija je ona je ponuđena ... ona je samo prepisana iz ... iz ... iz onoga na bazi broja osoba koji su sad trenutno u dnevnim centrima. Taj broj će se sigurno povećati. Kad pričamo o parama, meni je danas degutantno slušati priču jel' 50.000,00 ili 500.000,00 ili milion. Zar za ovu populaciju treba biti pitanje koliko je to novaca? Jel' to pitanje treba bit'? Ja ću vas držat' za riječ danas poslije ove diskusije kad budemo usvajali budžet i kad budemo radili rebalans budžeta, kad se za ovu populaciju bude tražilo još milion maraka, onda ćemo vidjet ko je ... ko je populista, a ko je iskreni, ovaj, ... ko iskreno podržava ovu populaciju. To je suština priče i to će biti suština priče kad ... kad se budemo, ovaj, gledali u oči i kad ... kad prođe sve ovo. Broj korisnika se povećava gospodo. Ja sam to rekao i u uvodu i to se vidi i u Elaboratu onome. Broj korisnika se povećava iz više razloga. Iz razloga što ... što prerastaju oni koji ... koji ... koji ... koji dobnu granicu, pa nisu više djeca, pa su onda odrasle osobe. Broj korisnika se povećava zato što smo mi formirali ove dnevne centre, pa su ljudi počeli da koriste usluge tih dnevnih centara, pa onda djecu koja ... za koju se nisu ... za koju se nije ni znalo, ovaj, da postoje negdje u nekim ... nekim ... nekim ruralnim dijelovima kantona, ovaj, se kroz ... kroz centre za socijalni rad, ovaj, socijalnom analizom se ustanovi da su to te kategorije koje trebaju koristiti te ... te usluge tih ... tih dnevnih centara. Dakle, novaca će trebati puno više nego što ... što se planira, ali ovo što je u ovome Elaboratu napravljeno, napravljeno je na bazi onoga što je sada trenutno, što se sad trenutno, ovaj, koristi usluge tih dnevnih centara, ta tri koja su sad nužna priča da se završe, kako je premijer rekao kao jedan nukleus oko kojeg će se formirati ostali terenski ... terenski centri u ostalim općinama, kao što su Zavidovići, kao što je Olovo i naravno Tešanj koji ... koji najozbiljniju priču radi u svemu ovome, ali odneks ... od nečeg se mora krenuti. Dakle, mora se krenuti od onoga što sad imamo. Ja sam htio toliko samo da se osvrnem na ovo, da ... da danas nismo ništa novo čuli. Doktorica Mundžić je dobro razumjela. Znači, tu su, znači, novci koji su sad na raspolaganju i biće samo preusmjereni ... neće ići na udruženje, nego će ići na ... na ovu ... ovu ... ovu ustanovu koja će to ... koja će te ... te aktivnosti preuzeti. I nije istina da Dnevni centar u Visokom nije funkcionir'o zato što Vlada Ze-do kantona nije ispunila svoje obaveze prema Dnevnom centru, nego nije funkcionirao zato što mu je bio blokiran račun, a Vlada je sve svoje obaveze prema Dnevnom centru Visoko ispunila i ispunjava redovno. Neko je rek'o. Ko god da je rek'o, znači, nije točna ta konstatacija. I nije istina da Vlada ne ... ne ... i još sam čuo jedan puta da Vlada svoje ... svoje obaveze ne ... ne ispunjava prema ... prema ... prema tim dnevnim centrima, da oni zbog toga ne mogu da funkcioniraju. Znači, to moramo radi javnosti, radi istine da znamo, da to ... da to nije točno. I baš zbog tih ... baš zbog tih problema koji se događaju nevladinim organizacijama kao što je Udruženje „Humanost“ iz ovih situacija koje su im se događale, zbog tužbi koje su imali, ovaj, zbog angažiranja radnika po ugovoru o djelu sve ovo se i pokreće, sve ovo se i radi, da se dovedemo u institucionalni okvir da nema radnika na ugovoru o djelu, zaposleni da budu svi u okviru ... u okviru institucije angažirani kao profesionalci, kao ... po sistematizaciji, odnosno po struci koja ... koja zahtjeva za pojedina ... za pojedinu ovu ... pojedino radno mjesto. Evo toliko, hvala vam. Drago mi je da smo čuli sve ovo, pa vidjet ćemo kroz raspravu šta ćemo dobiti novo.

PREDSJEDAVAJUĆI

Ja se zahvaljujem ministru, ali molio bih vas da iza ministra ... Kolega Karavdiću, možete li biti toliko tolerantni? Mislim ... izvolite, imate ... ali ja ... ne znam šta da vam više kažem ...

SENAD KARAVDIĆ

Imam pravo da izađem, a hoću da kažem ministru samo, ne znam kako je shvatio da sam ja rekao da je Vlada kriva, naprotiv. Vlada kantona je jedini subjekat koji je u potpunosti ispunio obaveze prema Dnevnom centru u Visokom i ukoliko je shvaćeno drugačije, smatram to eto jedinom pogreškom. Ja sam rekao da Dnevni centar nije radio zato zbog finansijskih problema, jer je bio blokiran račun u ovoj organizaciji „Humanost“, tako da se nije moglo ni uplatiti ono što je općina imala namjeru. Da bi se to izbjeglo idemo, znači, u ovo institucionalno stvaranje javne ustanove na kantonalnom nivou. Hvala.